

人物考六

游宦傳

宋

楊敏求應龍會祖宋神宗元豐元年進士官朝散大夫

徽宗崇寧元年上書諫元祐皇后不當廢忤蔡京意

言官劾罷歸外岡里

秦立曰鄉賢祠中有朝散大夫楊

龍非也應龍乃武功大夫非朝散大夫也

楊滋宋武功大夫應龍孫生有神異理宗朝官兩淮安

撫制置使時淮民多避敵遷徙滋為招集撫綏籍其壯

者分屯要害敵猝犯境出奇兵兩翼夾擊之一夕破敵



數若捷聞詔褒之尋以病乞骸骨不許卒於官勅贈護國忠惠侯廟食里中

俗稱楊老相公

元

朱清張瑾備知海道曲折伯顏平宋二人上策言海道可通造平底船六千艘運糧四萬六千餘石由道入京伯顏爲置都漕運萬戶府使二人掌之

黃鈺字子相治春秋泰定四年由經學辟宜興州教授遷中議大夫常州路勸農總管

明

袁銘字德新生元季隱居東海昌明春秋學得中屠仲

經生所宗乙酉同考應順天鄉試所得士皆碩儒在學

逾九載將遷卒

見王煥如蘓學景賢銘

楊瑱字九韶號恕齋成化元年舉人江西袁州府推官嚴辨有聲民畏愛之還家翛然物外

戴冠字章甫號濯纓子由長洲籍宏治歲貢任浙江紹興府訓導著書二十種行世傳載蘇州府志長洲縣志人物紹興府志名官吳中先賢記列朝詩選丙集明史文苑附見弟冕字辰正由宛平藉中宏治乙卯科經魁丙辰科進士歷官禮部儀制司郎中掌制誥入直文淵閣國學題名碣蘇州府志選舉表俱載係嘉定人縣志

遺

蔡昂字衡仲由淮安籍舉正德九年甲戌殿試第一甲
第三人官至禮部侍郎贈尙書嘗著瑞鹿賦古博典麗
膾炙詞林有後叅集

封澂字大淵馬陸人錦子宏治己酉舉人任雲南順州
知州有撫彝功遷湖廣衡州府同知晉階中順大夫有
默菴稿

姚隆字原道南京留守衛籍嘉定人宏治壬戌進士授
新昌知縣擢禮部郎中正德十年出知荊州府平易近
民仁恕立政在任七年民安事集以忤當道考免去之
日民遮道號泣不忍舍塑像以祀稱賢守云
見荊州府志

張九一字助甫號周田邑人由新蔡藉中嘉靖壬子癸

丑鄉會試歷任黃梅知縣吏部主事郎中尙寶少卿謫
廣平府同知遷湖廣按察僉事涼州兵備副使山西右
布政擢右僉都御史撫寧夏有南塘藁綠波樓集

湯聘尹字國衡隆慶戊午進士知江西進賢縣擢吏科
給事中福建布政司參議有茂禧堂集

陳舜道字見華萬歷甲午舉人由彭澤教諭中丁未會
試歷官應天府教授南北兩雍學錄刑部貴州司主事
南京刑部浙江司兼署山東山西等司陞本部廣東司
員外出爲廣西柳州知府罷歸日坐一室中焚香讀易
人咸欽其晚節
臨雲堂雜錄曰一字
萃樂筵故不顯于官

陳國紀字君陳萬歷丁酉舉人廣東潮陽知縣多惠政

潮陽瀕海寇以舟師圍其城率衆守禦甚力因得解
尋以養母告歸構燕詒堂唐時升題其柱曰客來豈復
題凡鳥官好猶傳祭鱷魚有燕詒堂集

龐應鳳字子儀號梧岡萬歷歲貢己卯中順天鄉試授
滁州學正在滁六年與滁人士游醉翁亭文酒勸讌有
滁游草

何選字靖卿居婁塘萬歷癸未進士授河南臨潁知縣
調繁南昌俱有惠政入爲監察御史遇事敢言與鄒元
標齊名時在廷方以國本爲憂選屢疏抗爭留中奪職
王錫爵當國歎曰何君與二三大臣同憂國事今使失
官吾之責也天啓改元還原職特贈光祿寺少卿選初

窮約教授自給嘗館於大賈家其人結納公卿貴人皆
得其懽選居四載日惟論說經義侃侃不少降詞色及
爲御史僦屋而居有富人推甲第讓之且致厚幣却不
受曰吾爲窮諸生身處脂腴間未嘗自潤今居言官乃
受人餌耶其始終一節如此子其瑛萬歷舉人官至兵
備副使

申芝芳字素公居城天啓丁卯舉人崇禎辛未進士歷
知江西萬安縣兵部主事禮科給事中督漕江浙起家
清約官橐蕭然或以爲諷作詩自解見唐韜生水窗叢
筆

黃世能字濟夫以椽吏任陝西平涼衛經歷平涼府靈

臺縣賊聚衆萬人殺傷官兵兵巡董國光率大軍擊之
世能從國光以數百騎授之使覘賊世能曰偵賊不宜
多人多人則賊必以我爲挑戰遇輒鬪鬪必死今我以
數人往賊不構乃可得其情國光嘆曰經歷知兵我不
及也世能往盡得賊要領以歸遂擊破之國光以爲才
委署崇信又署安定革去浮費八百餘兩皆前此吏入
私橐者世能雖身居散秩不畏上官平涼司理楊某欲
坐一人以重辟世能察其非辜力爭之楊知不可奪卽
爲縱遣而陰中世能以不謹罷官巡撫顧其志怒曰經
歷廉直吏乃爲所中耶亦劾罷司理初爲掾吏時他吏
坐官舍失火當死世能哀其人詭承火從已發上官疑
其事兩釋之嘗於涇陽逆旅得遺金二百餘錠物色其
主還之不告姓名而去靈臺平涼府屬趙志作鳳
朔陶菴集作西安皆誤
陸時隆黃長者傳曰世能開敏有才不自用務以誠
待人人稱爲長者嘗攝平定獄一囚年十九所坐事
皆二十年以前世能曰豈有人在母腹便爾作奸者
耶白於當事以釋靈搖殺官吏有引以反聞議發兵
撲滅世能曰事起小忿官司激成之渠魁不過四五
人亦非一軍盡反也但按兵于此當自解散遂輕騎
往訊之果非反也世能諭以大義首惡願伏誅縛數
人而一方事定孫卽淳耀也

國朝

瞿士睿字智先任廣西岑溪知縣值兵燹初平士睿招
集開墾增歲額三之一且糴穀賑飢捐俸修塘以利民
徭有負固者多方開諭悉輸稅歸誠其功最鉅事載岑
溪名宦傳

毛贊字聖羽順治辛卯舉人任興化教諭陞廣西荔浦
知縣汪介人寄以詩曰時當清泰喜彈冠十載浮
菴盤叔夜不堪行作吏次山亦復漫爲常思劇地逢
迎苦况復徭民撫治難老友含妻通遠訊故園松菊未
全殘沈繹堂云聞喜羨地潛壺且歸聖羽令荔浦乃恋
恋五斗耶介人此詠不啻北山之移

項思尹字莘友號平菴八都人遷南翔順治戊子副榜
任兖州通判督視泲河向設官銀爲河員肥橐思尹革
之城壩有閒田爲捐俸植柳以紓民力清節太峻失部
使意投劾左遷篋中惟泲游詩草一卷父老泣送者千
人歸家後仍坐寒皚教授陸當湖甚重之兄思■顛免
明末濫加糧漕銀每年二萬七千餘兩

程瓚字鬯三號榛麓太學生與王敬銘同爲孫致彌壻
康熙朝薦入武英殿纂修佩文韻府月令廣義書成議
叙知陝西商南縣修文廟建義學教民引渠灌田鑿石
建永定橋以通行旅惠改在民實有渡虎驅蝗之驗以
賢勞歿于任邑民至今思之有支頤商餘二草弟鈺以
孝友稱瓚歿後貧無以歸鈺赤手經紀數千里外扶櫬

還鄉邑人陸鏡傳其事

顧岱字商若一字泰瞻號止菴又號輿山順治甲午舉于嘉庠戊戌成進士初任銅山府推官後歷官潞安杭州知府孫預字元凱登雍正甲辰賢書任潮州府同知錢顧琛字獻侯號慎菴吳縣人以嘉籍顧琛名遊嘉庠食餼後加復本姓中康熙乙卯鄉榜已未成進士任湖廣黃岡令有惠政在嚶才名籍甚及門多知名士

申毓來字子與號容城又號蓉江康熙初歲貢考選教習江西南康知縣輯邑乘建書院拔寒畯又太守欲行均田法履畝清稅毓來力爭不可時有強項令之日南康人立祠祀之著有未達草

印應騰字雄飛所居名北園有池亭竹木之勝官刑部雲南司主事

石瀟字天彩號邵菴居南翔康熙中任直隸霸州判官復監陝西興安州與郡人錡應秋同修郡志著有留餘堂詩草應秋序之

徐匡字漢衡居外岡康熙乙卯登賢書除浙江嵎縣令寬厚廉潔罷歸後清風襲人有時玉堂稿

王中銘字永思悲凡之孫初名龍爲華亭學諸生遊京師易今名入太學由纂修館議叙授河南桐柏縣在任兩載告歸

吳翔字元鶴居槎里以貢授知嶧縣所著名偶詩梓以

問世吳氏家乘云順治辛卯由府庠拔貢趙志翔作庠注云府庠貢監程志入例選

劉幹原名楨字上旋居劉行鎮由府庠生中康熙癸巳鄉榜留京十餘年至雍正甲辰成進士授涇縣令性伉直後極儉樸布衣蔬食讀書外無他好著作繁富有荻涇詩草

王世樞字斗初號訥齋居南翔雍正乙卯舉人乾隆丁巳明通授崑山縣教諭有學吟稿百花詩等集

馮致芳字孟隣康熙丁酉舉人授四川永川知縣以致仕歸有芝山詩集

張陳典字徽五號毅庭本姓陳外祖張用之立以為嗣因博醫業由廩生中雍正甲辰南闈乾隆丙辰進士謁選得貴州銅仁縣威惠兼著苗民咸畏服之歿于任著有陸舟賸稿燕翼堂集

唐貞一字晉封號鳳崗太學生雍正間總督尹繼善巡吳淞江貞一年二十五上言水利甚悉公嘉其才即奏舉廣取人材例發陝西歷署漢陰醴泉縣有能聲會金川軍需總督岳鍾琪檄調神木米脂定邊等縣辦理軍務貞一具幹畧上官咸稱其才委署寧羌知州卒于官官囊蕭然岳公贈賻三百金護喪歸里

李錫秦字瞻仲號硯農金山衛籍監生中雍正甲辰順天鄉試任廣西羅城知縣歷官至廣西巡撫卒于任御賜祭葬著有義寧紀畧等書本邑之東南境人後遷

居南翔

毛大瀛曰中丞幼就鄰塾前一夕主人夢一黑虎繞堂柱事與韓蘄王畧相類長通韜畧練習騎射戈矛超距之技宦遊粵西不避艱險冒矢石剿平猺崗逆寨雖名將不是過也

程侯本字漢封由青浦庠貢入成均效力南河銓授正定同知恭逢■鸞輅南巡駐蹕恒山召見賜克食丁內外艱服闋補寧波同知乾隆二年晉寧國知府民俗多棄女不育出示禁之勸之以情諭之以理後遂無有蹈前轍者

葉暉字炳南號東壺少爲高才生游唐孫華張雲章之門乾隆元年進士授戶部主事遷員外郎郎中擢長蘆鹽運使告歸家居養靜垂三十年年八十四卒詩文成家書法遒勁畫墨菊有別致

唐朱英字君榮邑城人寄籍直隸文安縣榜姓董乾隆己未進士任貴州畢節縣知縣有德政詳載于畢節縣志改任山東臨邑縣知縣內陞員外郎

張耿光原名欽昊字授時號訥菴孝廉欽銘弟由考職州同仕至揚州府江防同知博學通才最善章奏時河工人員尙無迴避本省之例耿光佐南河督幕府參贊機務多所建曰生平和藹近人好汲引後進會將超擢觀察而卒子調元北河州同

王處厚字大惇乾隆己丑進士授安徽穎令縣有塚鎮民回雜處俗極強悍械鬪時人動以千計善良維人枕處厚嚴鞠得寔槩擬重辟俗始寧謐鎮民立碑頌德在任二年以疾告歸囊橐蕭然

顧鑄字金祥邑諸生長于韻語著有博齋詩鈔上海曹錫寶序之又與汪炤錢塘王元勳毛大瀛張允武諸廷槐王鳴韶王初桐林大中印照張崇儵等彙刻練川十
二家詩鑄精於六壬五星之術後爲慶遠府經歷卒於任

秦嚴玉字范成號藍田乾隆戊子舉人定遠縣訓導以年老屢欲告歸爲諸生苦留沒於任

隱逸傳

元

秦輔之字道山居邑城隱居行義博學善詩文邑未有志輔之始撰練川志又著格物擇善錄易經史斷武事要覽棠陰政績忠孝百詠散佚不盡傳

強珥字彥栗居南城讀書工詩負奇氣早游京國徧交知名士值兵變歸隱學宮之旁時與秦崑阮孝思輩流連觴咏至正間薦授常熟州判官不就昺字文剛號橫塘叟嘗辟爲訓導

嚴恭字景安居黃姚父淑仕爲通山縣尹恭才藻斐然恬淡不樂仕進嘗築室海上號惜寸陰齋以琴書自適

後避亂於青浦之章堰

明

朱鶴號松鄰工圖繪尤深于篆學漢人官私印章自大
小篆外有摹印一種謂之繆篆其法不傳故至宋元而
印章之文一變鶴少從松江曹憲副時中受六書之要
深得繆篆不傳之法窮工造微旁及雕鏤小玩無不稱
絕性高潔博雅嗜古嘗游海內所交多名士與上海陸
詹事深稱布衣交尤善子纓

朱纓字清父號小松山人居清鏡塘貌古神清以技能
自託性嗜酒故獨酒家能數得之他求者弗即應也或
勸之止酒纓曰酒止而生何爲者世間應子豈盡醉

死哉復歌之曰去本無妨留亦得何人不是遠行人尤
不屑與富貴人交縣令嘗召之不往令急之曰我能破
家纓笑曰我乃無家可破徽王以弊召纓謝曰鋤草衡
門則有餘曳裾王門則不足未幾王坐法廢人服其先
見其書工小篆及行草畫尤長於氣韻不多爲詩而間
一書其中所欲言悠然之味嘗在言外朱令廷益表其
廬曰練水逸民徐允祿爲作獨行傳子稚美稚征清父少而
端凝以禮自持弱冠時有試之者暮置一美妓於一室
招清父人而鑄其戶至晨啓戶叩妓所爲妓言無有聞
者皆笑爲
魯男子

稚美字伯魯工詩文善書法殿職方都贈詩云而翁自
是九皐鶴之子真成千里駒然性恬退與徐允祿張表

劉維藩稱練川四飲以諸生老允祿作練川四飲記徐
字汝廉張字明父劉字价伯稚美恥世俗之諛墓自撰
志銘學者稱萬松先生所著有幽居寄間稿子貞一敬
一貞一字元伯丙午舉人國子學正敬一字欽仲諸生
稚征字三松祖父兄弟三世並高尚征性簡遠喜飲酒
每于荒城古寺細雨大雪中擁笠攜壺嘯咏自如善畫
遠山澹石叢竹枯木尤喜畫驢酒酣輿發輒作灞陵風
雪圖以寄蕭瑟淒清之致其雕刻更爲擅絕刀不苟下
輿至始爲之一器常歷歲月乃成人見之者情愜則任
其攜去勿惜意所不屬卽遺以多金弗顧也有貴人欲
見每削迹滅影避之其孤僻之性視祖父更過之世外

逸品也

朱偉字翼四著史論三
于其苦志亦不可沒

張名由字公路號六泉通古今學好奇計家在安亭有
田數百畝僮僕數十人一旦盡棄去爲貧人人皆笑之
已而徭役繫數里中中人家或嬰縲絏老死囹圄而
名由坐環堵中讀書談道足跡不至縣庭向之笑者皆
嘆慕焉平居好論兵其於古人勝敗之數必求其所以
然北歷燕趙齊魏之郊登眺山川形勢問昔人城郭營
陣之處往往悲歌慷慨恨不馳驅其間嘗自謂風塵之
際運籌帷幄之中提枹鼓會軍門使萬姓喜勇賊幾兼
之矣名由與學士大夫居則談說經義見少年輒言刀
劍矛戟之用人人樂與之處乃其胸中之奇一縱一橫

應變不窮則知之者鮮也與歸有光居隔一溪讀誦相
呼和其經術議論本之有光劇切爲多晚學管勿安坐
一木榻足不履地年七十九卒唐時升曰名由初
名凡改名名由
候爵字良貴發言砥行一誠不移成仁間應貢聘久之
不樂仕進詔授州判官隱去號曰梅隱嗜古書名畫日
置座隅抗志以終

沈宏正字公路由八都徙東城居母喪三年不御酒肉
久次諸生絕意仕進天啓初詔求巖穴之材大臣疏薦
弗應爲園十畝有水石竹林之勝詞客酒人常滿座性
喜聚書所藏多善本晚以病謝客覃思著述名山祕笈
苟力所及不啻飢渴求之雖病必日夕一編曰非此無

以療吾疾也然困於市義死之日家無餘資嘗自謂富
於黔婁飽於伯夷健於叔寶壽於長吉餘俱聽之冥數
董其昌曰公路劇采逃虛遂狷介之性似靜者其結客
振窮挾湖海之氣似俠者其憤世放情寄聲色之游似
達者至夫沈酣竹素讐校魯魚聚可汗牛藏無游蠹斷
簡必續僻事能徵又今之博雅君子也

閔裴字裴村由南翔遷居東郊性好詩與葉允陞石農
游每於蜻蛉舟載書數十卷破風躡浪出奇句於灑煙
柳雪之間擊榜大呼蘆人漁人知之不願屠沽兒知也
所居老屋數椽竹厨土饍饘粥不給有憐其貧賑之者
峻拒弗受其人怒推裴墮溝中因跛一足生平事母孝

撫二弟有恩侯峒曾題其廬曰孝恭黃淳耀哀刻其詩序以傳之

王泰際字內三居六都祖汴字震峰好義樂施建石梁自東關至六都相接歲饑賑粟爲一邑倡泰際登明崇禎癸未進士嘗遺書同年黃淳耀作偕隱計淳耀荅書謂去城而鄉雖埋名不能而潛身可得冠婚喪祭以深衣幅巾行禮終身稱前進士一事不與州縣相關絕跡忍餓焉可也泰際卒守夙約遁跡故廬築室三楹顏之曰壽硯因自號曰硯存老人撫按相繼勸駕皆辭弗應隱居逾三十年而沒知縣陸隴其爲文祭墓比之龐德公陶靖節學者私謚貞憲先生子霖汝字公對楫汝字翰臣皆登賢書有文名而楫汝尤以行誼稱自有傳

陸時隆謚議曰王內三先生沒之日故交門弟子思慕生平大約謂公真百世師也易名之典其何可已於是蘇淵侯汭彭志古等相與議謚按謚法清白守節曰貞博聞多能曰憲宜謚公曰貞憲

申艇字虛舟居羅店三歲而孤母楊撫之成立讀書砥行中明崇禎己卯副榜後隱居奉母授經以老著有見聞隨筆皆勝國三百年中軼事有關風教者

陸坦字履常居南城父嘉穎字子垂工詩坦由府學舉明崇禎庚午鄉試與同年楊廷樞以名教自任己午奇荒著鄉兵議條畫甚悉後隨父僦居吳門隱於賣卜

朱樵字蕪元號夢圃明季時從兄之尙欲導之謁張西
銘溥入復社樵曰吾務闇然之學何奔競爲也躬耕祁
岡與太倉陳瑚崑山諸士儼挫廉逃名所著名雜稿行
文皆有根據明大禮私議廣歐陽公濮園議其尤著者
詩筆樸老其言皆係世教

孫和龍字襄臣號亮子元化姪崇禎庠生有少微亭稿
侯開國曰襄臣舅氏負氣節有幹畧尤精數學凡太
乙奇門遁甲推等精詳占驗輒中人以康節青田擬
之嘗自推算當於某年月日謝世至期果然

龔元侃字得和號南溟崇禎諸生以父用圓伯用廣死
忠與兄元昉隱居不出時賦詩以常勸哭及古博雜錄

于理學從遊皆名士既歿門人私謚孝節先生有隨齋

詩文集許自俊序之

南溟唐叔達外孫從兄管廬妻子
柔外孫清門宅相風雅均有師承

金汝鉉字公調居北城施鳳鳴字仲臯居羅店皆明季

諸生富貢不就汝鉉隱於醫足不出戶就診者常接踵

鳳鳴安貧以沒齒有古高士風

蓋萬紀字無紀明諸生聞闖賊陷京師痛哭累日卽棄

儒冠隱東郊所居屋三楹不蔽風雨前植梅數十株日

吟其下人比之劉逸民

國朝

嚴鉅字式如居南城落拓不羈工書法詩文清疎閒放
間作山水亦有淡遠之致嘗渡錢塘浮江漢登黃鶴樓

陟滕王閣留連吹竽擊筑之鄉經亂棄行李而南隱跡吳門與林雲鳳陸坦輩爲方外社號藝花長有綴雪齋草一硯齋稿散軼不傳

趙世鼎字以調號甜老萬歷諸生順治歲貢有詩文稿與許大達陳拱辰爲北里三逸

黃埜字雲沼明進士淳耀子四歲而孤蘇孝廉淵撫之後妻以女及長絕意應舉隱居授徒以老爲人介特有守不苟取予書法宗仰二王并工篆刻入白沙社有隱齊詩稿

朱湘字子旭居東城少受學於黃淳耀及淳耀殉節棄諸生授徒餬口性嗜書至老彌篤年八十有九

陸宗濂字維水號蔚庭徵君元輔子復姓王以太學考授州佐善書法通地理爲人清介古樸矜式一時雍正元年詔徵孝廉方正力辭邑人之薦著有益堂自怡集彭述字商年號梅谷山西渾源州吏目丁艱後入終南山修道乾隆間其子旭來至終南勸之歸不允遂無疾而終

藝術傳

元

譚友文字士元居月浦精陰陽家術仕至朝散大夫判太史局居官廉謹雖見知權要未嘗以干請自濶時論重之

龔浦二志俱名士元字友文今從都穆

唐永卿居縣治前宋時有以道者爲太醫院提舉從高宗渡江因家浙之紹興其後世世爲醫官元元貞中永卿爲平江路醫學教授始占名籍於嘉定誠子孫旣通經義必令學醫五世孫毓字玉成藝業益精明初薦入太醫院

明

周孟容居邑城寫神擅絕嘗繪一時名人楊維禎輩爲聚英圖

李明善工印篆文摹秦漢法入古王彝作印說遺之

翟祥字均是以字行通陰陽術數明太祖令占候皆驗

賜勅命世爲本邑陰陽學訓術號希微子宋廉爲作傳

范暹字啓東居城善畫羽毛花竹與張觀輩齊名永樂

間入畫供奉三十餘年

張觀龔志云嘉善人華亭志云楓涇人工畫山水師夏圭馬遠

馬軾字敬瞻居婁塘精占驗工繪事正統間以天文生

從都督董興往粵軍中夜半聞鷄鳴興問何祥軾言鷄

鳴失時當由刑罰不中宐申嚴軍令經清遠峽有白魚

入舟曰賊授首矣時賊舟千艘列陣南岸勢甚猖獗興

將進猶豫議請益兵軾曰兵貴神速請則緩不及事以

兩粵江右精兵取之如拉巧耳遂決戰大破之先是有

大星夜墮軾言賊平近在四旬內無不神驗歸補漏刻

博士其畫宗郭熙與錢塘戴文進齊名與修撰岳正友

善正謫欽州無敢送者軾獨爲詩送之子愈

愈字抑之號清痴又號華髮仙人天順甲申進士官終
南京刑部主事考其言行蓋學遂行馴之人也正統間
王振第前以鐵絙繫狼馴不咋人餒則曳絙搏屠擔肉
一旦嚙振馬振錘殺之愈曰狼野獸貪民物也使之奔
走京城是爲毛蟲之孽梁邵陵王綸將兵援臺城蟄熊
嚙所乘馬綸爲王僧辨敗走尋殺于西魏狼嚙振馬當
與綸同占崇文門外井中五色氣起愈往觀之曰按五
行傳此水異也陰盛之象振擅權水爲異以示象也大
通橋風吹墮人驢俱溺死來俊之以問愈愈曰此恒風
也風以鼓萬物其揚沙飛石者怒也吹溺人驢怒之甚
矣爲述昔有胡人乘驢行旋風飄舉直上千餘丈墮地
車騎皆碎之事人疑其誕愈曰隋仁壽二年事也取書
觀之益信武清石臼與祿軸鬪人曰無情物也何能鬪
必無是事愈曰無情之物相格鬪者自古有之天寶中
葉縣二土塊鬪中有血出後齊清河中殿上石自起兩
兩相擊紹興中樂平田水高平地數尺里南井水溢亦
高數尺鬪於杉墩皆無情物也此皆妖惟有德者勝之
太常寺雜書牌額額上口字不合是非旁午合之遂安
人問故愈言祈禳壓勝理或有之但不知其所以然且
錢塘一寺甚佳而僧好訟沈睿閱僧堂見堂字口不合
戲塗合之爭競遂止又聞有水火災須州縣牌額投之
得免靖康時尙書省火延及禮祠工刑矣吏部拆尙書

省擲火中乃息此皆禳法也御用監來定往南海子昇
酒肴爲路食至羊房大柳下顧一鬪體在旁來夾肉濡
蒜投之問之曰辣否卽應聲曰辣辣比返呼辣之聲隨
之城隈始絕人怪之愈謂來將亡矣陽氣已虧故陰得
以干之况冥穢之物不宜與戲戲則吾心不得其正心
不正邪遂乘之不可不以爲戒其論禳祥一本正理反
歸于修德故非京焦之家所能及也一日在英國府其
勳衛出建安瓦硯李廷珪墨愈締視良久曰此墨若真
大有年矣廷珪唐僖宗時人僖宗至唐末三十六年經
五代五十七年歷宋三百十七年歷元九十三年至昭
代又八十餘年廷珪墨不知猶存否也令試之曰此真

廷珪製矣聞之前輩云料用真珠三兩擣十萬杵成用
若干分以水依分漬經宿乃不傷研此墨剛而畫研殆
其真者勳衛曰實先祖受賜內藏物也其學考核類如
此所著有馬氏日抄舊志稱其能詩善書尤長南詞樂

府
封錦字尚綱

龔志作尚文

號慎菴馬陸人景泰三年貢授山

東東平州同知善書工篆隸爲人恬淡喜汲引後學王
翹字時羽一字叔楚號小竹山人弱冠隸邵博士籍性
骯髒不隨俗俯仰饒有機畧嘗贊畫軍府詩宗孟郊畫
工竹石間仿米家山水草蟲尤精妙絕倫酒酣濡筆求
者無不滿意去豪貴強之卽不可得嘗冬月詣故人金

兆登宿兆登伺其寢潛以新衣易之質明仍索鶉衣服
之而去載明詩綜及居易錄

徐汝廉曰小竹畫草花蛺蝶叢菁蔓藤而蚱蜢絡緯
隱跳其間或巨蠲踉蹌行亂葦沙渚中蝦行鼓水作
勢又水荇一帶羣小魚攢會其底大抵皆生氣變發
絕得其神勢雲間孫雪居極好之以爲逸品

王道通曰翹日坐灌莽中視草蟲飛走深秋時種籬
豆成陰置絡緯其上聽其飛鳴久之遂能寫其狀并
其天機神理下筆輒肖數年名大起太倉王世貞聘
致門下一見推獎謂其畫自成一家後有人得其所
畫絡緯圖粘之壁中夜絡緯聲大作細聽之乃在壁
間人咸驚異

朱組纓字素持號耐菴諸生書法宗歐褚精小篆山水
得倪高士法

唐樸字尙質永卿七世孫居城博聞高行而以醫名一
病者更數醫不效延樸診之因出前醫諸方樸指之曰
某某皆不應經旨某法是矣而不效者病人偉軀幹以
常劑投之故不效卽其方加數倍飲之立愈嘗過張秋
役夫大疫樸置藥貯大盃飲之活數千人年八十餘晨
起見青衣童子捧簡至曰請歸樸歎曰上帝豈以張秋
之故耶無疾而卒弟椿字尙齡名與兄埒嘗參考諸家
方論著原病集行於世從子熇

熇字德明未冠名聞四方陳進士父病熱發狂踰垣越屋壯夫不能遏熇令貯水浴器中令有力者捉而投之方沒股不復跳躍矣因遍沃之遂倦臥汗出而解太倉武指揮妻起立如常臥則氣絕欲死熇言是爲懸飲飲在喉間坐則下墜故如常臥則壅塞諸竅氣不得出入而欲死也投以十棗湯而平從孫欽訓字道述能世其業

傅瓌字汝文居江東世業醫瓌視病決死生無不驗者鄉人黃氏疫延瓌且至聞有鬼相語曰傅公來柰何一曰吾覆其藥耳已予藥輒覆黃具語瓌親持與飲遂起太學沈生妻死而未殮瓌視之謂尸厥耳不死也急治湯液灌之應手而甦陸詹事妻病蠱甚篤以匕劑得前後洩卽愈嘗與鄉進士沈積同舟臥舫其足脉歸語積父曰郎君殆有疾微不宜令與計借不爲意卒道死其神異多此類授醫術訓科人稱頤善先生

沈卜琦本姓卜字一韓居江東少從中丞孫元化遊具經濟寔學元化治兵邊關卜琦常在軍幕已而歸里補諸生旣丁喪亂輒去家崎嶇兩浙間四明謝三賓初爲嘉定令嚆士避兵入越者多依之琦亦往焉及師渡錢塘謝問策琦曰勢若不支捐軀殉義上也不然扈從南行彼戈待旦次也不然被野服竄深山絕跡人間又其次也謝皆難之於是復歸嚆琦屏居村塾口不談時事

及歿崑山諸士儼私謚之曰景白

沈祁字雨公南翔人工繪事侯涵稱其華墨老蒼可與松蘅鼎足喜山水遍遊匡廬西華入浙溯錢唐上下東陽兩硯間謁天童密雲師而返著游草一冊謝三賓序之

嚴恒字久持號榕齋衍之子工書法性行淳樸足不踰里閭而能深知天下形勢常畫地輿于尺幅中山川城郭瞭若指掌著有言志集自七十至八十詩格益進

秦昭績字仲山諸生文法徐庾書摹顏柳詩學孫雨齋所著有嘯岩集

河真高亮仁所精於醫學家疾多奇中由吏目陞御醫

加鴻臚寺署丞保御神席賜龍鳳宮扇宮帕等物又侍光席于青宮屢賜膳脩酒脯有加年七十卒子平

陳嘉選南翔人崇禎中游京師進呈書畫授武英殿中書今鳳池清祕額尙存

沈齡字壽卿一字元壽自號練塘漁者居安亭善詩文尤精聲律嘗客太傅楊一清家武宗南巡幸一清第屬撰四喜傳奇選絕聰慧者習之隨撰隨習一夕而成明日令供奉武宗喜問誰所爲一清以對召齡欲官之不受而歸歸有光曰元壽慕宋柳耆卿之爲人撰歌曲教僮奴爲俳優以此稱于邑人

王綸字子音居羅店能文解歌曲嘗以紙鑿燈帶人馬花鳥諸形工細稱絕勢欲飛動爲世珍重綸嘗有遺世志一日云海

王來聘親知餞送竟入海正嘉間人
本王道通傳韓志物產內亦載之

殷道復字嘉甫生有至性父爲倭寇所逼道復冒矢石
急負之馮河以竄乃得免嘗與友人論革除事不合時
舟過崑山玉龍橋道復憤赴急流幾死精醫術里人有
病死三日者謂其家曰可活也灌以七頃刻而甦久之
得無恙道復中歲逃於詩酒七十無疾忽命具湯沐衣
冠曳杖立而逝有西莊集四卷

陸鑑字國馨聰警絕人弱冠病痿謝舉子業刻意學書
小楷鍾王八法具備行書章草咸入規度善鑑古法書
名畫器物毫髮不爽徐學謨謂其楷書遒勁頗逼宋仲

溫

金獻士字治文崇禎諸生遊侯廣維之門縱筆數千言
文彩橫溢與從弟熊士暨侯掌亭創立啓杜爲人輕財
好施工書邑人得之每藏弄珍惜弟造士字民舉善繪
事名亞漁山可云二難

載子來字文庶號晴山貢生工山水爲八名家之一長
於設色情態如生收藏家爭購之又曾與程嘉燧同選
中州詩刊行

金大雅字伯醇少稟伯兄大有之訓奪志力學有名於
庠旁通軒岐之書歲大岐人多病疫所治輒效遠邇爭
迎之父母遇疾朝夕侍側不去所投藥必遍檢方書或
慶麟於神然後爲劑以進其孝誠類如此一人少年在

官置婦於家子身上郡久之病瘵而所述病狀殆近女
如蠱人疑其容舍有私大雅往察脈曰今病在右言左
何也豈得之酒乎此不過兩劑卽起但病起後當脾肺
兼補以須元氣之復耳已而果然平生好急人之病有
求必應故人無親疎咸禮重之

張彥字伯美工畫山水及花鳥人物與吳門張宏君度
齊名亦工詩子芑字子揚傳其術

沈震字天威世爲小兒醫病者或不能具藥餌輒以錢
給之嘗至婁門於厠上獲遺金泊舟待之七日有常熟
人吉義哭之於厠前自言醫男女以有此金震問其數
震是即詩之家貧歿時幾無以殮有司致賻葬之

國朝

沈兼字兩之父漢川從朱稚征學竹刻爲高弟兼精思
追摹藝更出父上盡得稚征刀法非時下俗工所能仿
佛也并精篆刻習醫能詩有醉吟草

蘇或齋曰漢川父子以介行重於卿雖懷絕藝不輕
遊顯者門兩之終歲一布袍寒暑不易

唐蟠字穆如號冰菴崇禎諸生從婁東吳梅村王煙客
遊文詞外兼工書畫有柳東閣草其紀遊一編客九江
時作同邑李進士嘉猷序之

宣坦字平仲邑諸生居婁塘爲嚴衍入室弟子博學工
詩通醫兼擅丹青有婁溪詩文拾遺集王泰際序之又

著醫學心解

陸道淮字桐源號上游國學生善畫山水師事王翬吳歷好遊嘗至日本名山勝水足跡殆遍與清河大小阮北田上舍南華宮詹鈍閑詩老同夫大令筠亭徵君友善繪爲六遊圖一時名流題詠甚多

朱祥發原名德繁字士節早歲食餼工草書有敬亭詩草繆念齋爲序以行世

張煒字赤城號芝瓢槎里人善畫以花鳥擅長亦能分書畫幀輒加跋語辨物精審考據家不能及

王易字又白通書畫音律暨雕鏤雜技與歸梁唐裕功常唱和因范聰制招致客京邸南歸年已八十寓金閶又十餘年卒

金成祖字汝德勿通儒理長習岐黃病者經其診治一劑無不立瘳以術遊京師賜冠帶

俞堅字心一居北城會祖璫祖都世有隱德父琳精堪醫術堅品行方正少學醫于隱上金汝鉉常起危疾每慮業性多偏小不謹輒致害人著醫學慎術以發明其旨

吳之璠字魯珍康熙間南翔人竹刻精細得神稱名手後住天津不歸邑中傳者絕寡所刻筆筒有貢在內府者款鐫槎溪吳魯珍乾隆四十年睿賞及之問魯珍何人宰臣無以對退而徧緝遺書得之于南村隨筆卽

以入秦由是吳魯珍之名噪于一時南村隨筆亦甚行于都下

歸一飛字萬九善畫金碧山水暨草蟲花鳥

陶南望字遜亭號箕山性喜臨池晚年名益著常游吳楚間人爭延款著有瓢響浮萍等草惟草韻彙編行世楊芳字青之邑人善畫口無鷗黃遇酒輒笑

侯棠字悅舟一字月洲號南蔭庠生卽鳳阿弟善書并善畫松有雲清閣詩稿

陳情字文表居北郊畫花鳥蟲魚信筆揮灑皆有生氣金造士字民譽都事兆登孫工山水家藏名蹟朝夕臨摹遂得宋元人之祕壻陳培字綿孫學花鳥於虞山馬元馭酷似之

吳彝字端明善畫設色花卉師惲壽平山水師王敬銘兼工人物白描尤勝

沈蒼字葭渼善繪事嘗至京師從泰西人遊畫樓殿宮室工細無比

印茅茹字彙吉精通醫理嘗補刻震川遺文乾隆丙辰程令修志茹分任其事

茅旦字右周居西城本段氏之子少育於茅因傳其術爲胎產專家旁兼雜症治有神效爲人長厚端方于本生及茅氏貲產一無所受而兩姓諸喪皆爲營葬其時張仲奇從上海諸名醫指授得其祕療疾多奇中南城

張兆錫用之精小兒醫貧者竟予之藥又有馬廷相贊
皇沈三慰爾望成能以濟世爲心者

李安世字古師號省菴順治時諸生究心經濟并及天
官地理方技百家之言於青鳥術最精與孫學士致彌
善嘗偕入閩謁靖南王王待以殊禮著閩游草

郁維祿字夫賢醫士士魁孫履豫子世業醫自宋至今
已歷三十餘世子廷鈞字平一著洞陽鐵板書孫漢京
漢曙皆習世業京太學生曙增廣生著醫源名醫通鑑
初葺紀間等書

周怡字心友號澄懷邑諸生進士陳俶曾孫工行指法
得柳遺意年八十餘而逝子庠生令宣字懋嘉有孝
行

周顥字晉瞻號芷岩善畫竹與酣落筆風枝雨葉曲盡
其致山水有元四家之長竹刻更入神品出朱稚征沈
兼之上美髭髯性行高潔好酒自號髯癡旣耄猶豪飲
若少年終日不醉卒年八十九弟子徐樞字宗岐號雲
樵畫亦爲時所珍杜其寫竹亦能逼真

周笠字牧山畫法得從叔芝巖指授後遊廣陵見宋元
真蹟刻意臨摹遂臻絕妙尹文端公聞其名命乘舟沂
江繪長江萬里圖進御覽稱善

陸遵書字芙苑號得岑乾隆己卯舉人畫宗北苑大癡
會欽取內廷侍直名動公卿晚授會同知縣未赴任

而卒門人金夢蕙顧祝皆能傳其學兄授詩字蒼雅諸
生早卒蒼雅美丰姿性晚穎能詩旁及音律
則繡飲膳無不精巧絕倫尤長於畫

朱杏林字子正少好學兼善岐黃施診無懈子琬玉祕
製武侯膏治諸瘡效驗

沈步青字桐君邑庠生疎財仗義隱於醫盡心療治概

不望報貧者轉資給之所著辨惑論外有本草輯畧步

真如人陸介人真如志沈桐君傳中歲以事謫戍
遇赦歸居東城記問淹博於蟲魚草木考核尤精

趙曜字光遠世業醫著有痘科寶筏武陵楊士元爲序

子綿春字開暘克繼父業

張覲光字漢昭號北田有北田唱和詩程志稱其工於

醫而學識該博

周起字震初號則山居錢溪畫宗王麓臺胡在田謂其

詩文書畫俱佳而畫居第一

張迴字人遠一名古民號南田善養生家言踪跡半在

荒村蕭寺間能畫山水暨墨菊工行草詩亦清老白沙

社中之一同社比之鄭虔有南田山人集

楊褒字聖榮幼工鏤刻既而做古繆篆琢爲竹章章甫

出見者咸以爲得未曾有珍之過於金玉

嚴睦字敦九號荆庭居方泰乾隆庚午舉人畫宗黃鶴

山樵弟子王錦濤號蘭臯有出藍之妙

毛是經字大成究心草聖他好都捐邑中植此藝者絕

少惟是經能不墜婁黃衣鉢也

沈宏字寧遠號隱菴好讀書留心九章之學研究中西
歷術泰西瑪諾利瑪寶西法通憲考二卷圖居其半圖
皆旋螺縈髮宏能如法描摹不失杪忽凡歲差里差之
故五星遲疾日月交食之理無不洞澈其源所著有易
知算法及九章總要籌算新法等書

陶南珍字甄六居諸翟村明醫尤精於奕

童大鐘字始萬精通靈素太守趙西題額云今之仲景
沈敬思字欽明居城東門內能醫善祝由科治小兒驚
癇五疳應手而愈得錢輒以濟人家無爨煙不顧也晚
悟導引辟穀之術年七十四無疾而終

楊德曙字旭庭居黃渡世業

覽羣籍善治險症往

往出人意表邑令姚學甲書活人國手四字顏其廬

錢肇熹字希文外崗人邑諸生少多病因博觀靈素難
經甲乙諸書并宋元以來諸家書得其旨能決死生於
數年前不夾毫髮劉河人患疔羸數年徧體生五色輩
衆醫莫能識肇熹診其脉知有積食詢其所嗜云素嗜
牛肉肇熹曰此種牛毒也以藥下之大便成塊者數十
輩去而病亦除

王開祥字仰泉精堪輿以術名世壽九十三歲子宏字
偉臣充欽天監天文生以先業世其家壽亦九旬著有
山平指要合元總論子文叔爵詔俱傳習青囊

周鏐字劍堂善刻草書善刻小篆于竹製扇扇柄四行

兩眉不下一百數十字細如蠅鬚於使轉處曲盡其妙
李士溥字天如號勉齋居南翔工於繪事山水花草俱
得宋元人氣韻嘉慶元年舉鄉飲賓

張德芬字詠烈號雲巖工畫山水得李長蘅筆法

陳泰字彙初子鳳瀛字珊州父子皆善丹青所畫花卉
翎毛有香色俱到之妙

沈聞典字寧菴習岐黃之術早夜探索不數年其術稱
神服其藥者一劑而愈所著有醫學律要

俞榕字範倫號嘯樓湖北州同借補鶴峯州州判善繪
事得宋元人之秘乙酉南巡獻畫稱旨

湯文雋字永思號雪樵工小篆筆法與錢坫相亞兼善
繚書工畫詩筆澄澹有韋柳風致著有半瓦齋詩草

王珠字品泉好讀書寒暑無間至盲目猶令長女誦聽
不倦尤精醫術療人無算法大生要旨種痘心法達生
編刊刻行世

孫祐字有士別字蘇門善傳神黃棟字殿揚亦以寫真
場兼工龍眠白描法

莊式夏字禹門諸生工詩畫弱冠卒有激塘遺稿其弟
伊齡字聘三幼慧善寫生余學士集稱爲黃荃後身

金樹字雲從善畫山水得石谷遺法

康熙間外岡有周姓兄弟二曰梅葫蘆愛葫蘆者性極
巧造羊油鐙所繪花鳥人物山水剪去餘紙用羊脂燭

切鋪於紙背以鉛錫熨之表裡瑩徹薄於玳瑁夾以元紗精光迸射使人不復辨爲何物

汪聞字善說書陸君揚善絃索皆嘉邑傳人見汪价三儂贅人外集近有杜鈐字湘岑神明於奕蘇之吳中漢杭之劉繼武皆國手也鈐幾駕而上之下視說書絃索雅俗迥別

方外傳

宋

如茂號柏巖居雲翔寺戒行高深宋德祐中示寂前三日貽書邑令朱象祖與訣如期坐遊作偈云鐵船到听苦海波息快哉時兮風清月白

歐法師居黃渡崇真道院宋紹興中有雲遊道士與歐居數日別去期三日後再來可戒酒肴待我如期果至飲甚歡就歐掌中教爲符訣自此醮祀伏壇屢著神應後立化葉子琬字懷英號虛谷宋嘉定宰陳公邁請爲集仙宮住持賜號冲妙大師都道正事清修懋著工翰墨嘗自寫像并贊沐浴而化

莫起炎號曰鼎生宋寶慶間精于雷術酒醉輒伴狂詬詈呼役雪雷殆同兒戲至元中宋景濂爲碑文楊維禎立傳久居江東清浦鎮正統間猶在後不知所終

慧可居雲翔寺至正間貧民逋賦受杖慧可捐銀一萬

六千餘兩代輸

悅可字中庭居西隱寺精修淨業元統間賜號慈光高照佛日廣慧大師至正中無疾而逝茶毘之日齒舌不壞其徒行已工於詩所著有勁節堂集鄱陽周伯琦爲之序

明

李德睿字士明爲寧真觀道士攻于醫遇淮人李清隱投寶太師飛騰針法洪武初召見辭歸嘗攜瓢賣藥市中號鶴瓢道士張羽爲傳王彝高啓皆有賦詠

慧徹字士明高才博學洪武初嗣法僧錄善世通儒書所著有蕉菴集

思鎮字古田居護國寺工詩文所著有友雲集

智淵幼從太監鄭和使西洋諸國得形家異書永樂末出家南京碧峯寺晚歸栖東林社諳土性輕重决宅兆吉凶及先知火盜災祥延者日衆後爲荆觀音堂于馬陸終老焉人或探其書爲九天弔女所述不類世所恒用日多跌坐口占偈語衆莫得其旨年九十餘坐化大彰南翔寺僧永樂間預修心經金剛楞伽注解普明號雪窗居菩提寺精針灸善寫蘭與本邑能詩道士栢子庭齊名

道存字性中預纂大明三藏法教賜紫衣居昆福寺胡守法字浩然生有骨相始學易爲儒生嘗因病適一

黃冠至識之遂勸之入道且曰從我言疾即愈後當大振予門守法從之疾果平已而往從應元孫真人學宣德間入京領度又學于通妙邵真人盡得其術尋以龍虎山張真人薦住持城南東岳廟未幾奉詔偕天下高道校道藏經因禮部尚書胡濙薦擢神樂觀提點天順丁丑擢道錄司左演兼朝天宮住持成化癸巳遷左正一明年封平志守靜清虛高士尋進封冲虛靜默悟法從道凝誠演範顯教真人賜誥命銀印并封贈其父母宏治改元授左正一特令掌道錄事踰三年卒守法性質直謹厚尤以謙約自持頗精于術而尤本之以誠意以故用之有驗成化間屢年因旱禱雨皆應後年又旱

禱不應守法篆符于鐵授中貴往投西湖之龍潭頃之

西南雲起如鳥翼駐潭上俄見青蛇長數尺許盤旋久

之中貴還未入城雷雨大至上益喜賜第居之一日召

入便殿詢以天之感應之理對曰惟德動天至誠感神

此外無他道也上深然之聞者服其正對彙苑浩然集

志宗廟命其召鶴浩然架鼎高臺焚香雲水頃中鶴至尋命祈雪亦驗

覺異邑人祝髮於崇明普濟寺平生茹素未嘗妄語其

言未來事奇驗或臥于榻人有見其行于市者以此皆

稱覺菩薩成化十七年五月五日跌坐而化月餘面色

如生肢體温軟其身年久不朽舉之若空衣焉

道清字玉礪居留光寺天順間任僧錄司左善世宏治

間賜號宏慈廣惠禪師歿遣禮部尚書徐瓊諭祭其徒
戒縉成化中任右講經歿亦賜祭縉之徒定暲字東白
能書宏治間寫經第一擢左善世賜衣帽兩世並掌僧
印縉流榮之

敏行字聖樓槎溪白鶴寺僧徐時勉誦其伐樹詩有乍
減三分綠新開一片天之句可與張伯雨種樹詩並傳
性通號三際蜀之宕渠人居真際庵幼孤瞽目以耳受
經歷遊峨嵋雞足五臺補陀落伽至邑朔真際菴止靜
太倉王錫爵結方外交

大見字無等由屠戶爲僧敝衣古貌不乞布施而能說
經法學羅結方外交

張德熙字雲潭小字鑑邑中稱鑑道士居三教堂性誠
樸閉關修養禱雨驅妖屢著靈驗

通雲字石奇郭西徐氏子也十齡失怙出家南廣寺以
省母還嚶於護國寺壁間誦中峯傷悚焉猛省旣而住
靜虞山刺血書華嚴後游天童王雪竇十七年仍歸南
廣示寂寺故址荒陬師至開工建墜規模聿新四方參
學者躡踏如蟻集有語錄六種

行正字山夫婁塘人少出家侍石奇和尚有偈語三卷
大因字聞初護國寺小沙彌也程孟陽謂其冠羸善病
而獨健於詩梵貝之餘喜與諸名士交七椀百篇自饒
情味李長蘅取其清新唐叔達亦稱其敏妙有挂瓢詩

一卷

德徹字睿開號笠菴黃渡羅漢寺僧善畫工篆隸詩學
晚唐有樵餘草

國朝

呂慈字貞九號桴菴安亭人年三十六入清真觀為道
士戒行清嚴順治十八年亢旱邑人邀至集仙宮祈雨
逐疫皆有奇驗酬以金弗受遊終南得辟穀法歸構文
室于靈岩小桃源旁築石穴告弟子某月日當辭世如
期坐化其子榭傳其法居安亭東原道院

吳縣志曰順治已亥築樓

妙高峯後康熙甲辰五月手書一詩而逝

本源原名海原字兀菴金壇人初從金陵天界寺聽講
遊浙西尋師太白山後為山翁恣和尚弟子自號龍山
道人康熙已酉寄錫膠城真如寺辛亥遷虬江張懿寔
之西池精舍三楹為竹梅深處與侯汾沈白時采金莖
張銘輩倡和有翠微閣集儕鶴小稿行脚記事詩

徐松之曰兀菴詩持無底鉢鼓沒絃琴令讀者警醒
如五更鐘活現如空潭月

曉青字僧鑑號確菴又號高雲道者三峯僧寓錫邗水
與侯柅園為方外友

清柱字天立吳興人順治中居城之西林菴築放生亭
名輩皆與唱和著有非菴詩草

智暹字一筠號剖雪又號南峯道者弱歲以避亂離塵

係雲棲派能詩善書兼精琴棋篆刻卓錫槎上後延至城館於龔氏別業有慧香林稿行世

行津字慧遠號嘜江釋居東里靜室移城西地藏殿後赴上海鐸菴兩邑交稱其道履有山居草木詩行世智操字寒松號隱翁桐城人住青龍隆福等寺嗣法淨斯和尚嘗僑寓東岡入詩社與文字之飲著有拈來草方外英華九峯草驪珠詩持梵雅諸集吳梅村爲之序宗渭字筠士號紺池又號華亭船子華亭人剃染于松江超果寺寓膠居西林菴自膠之吳邑人士皆賦詩送之有練川贈言一帙其專集名芋香詩鈔

沈歸愚曰紺池少學詩于宋荔裳中年遊尤西堂之門得所傳授嘗謂門弟子曰詩貴有禪理勿入禪語

宏秀集雖唐人詩寔詩中野狐禪也

戒蔭字僧木振錫陽城老于安亭之草深菴置田廿畝命徒耕作日與詩友唱酬著有離鈎集也云草

育賢字大蔭族姓龔明學博用圓之子家難後母氏居吳山女貞觀育賢築室紫石山下以傍其母徐孝廉枋顏其廬曰臥雲深處年三十八薙髮操行清芳通內外典諸名山請主法席辭不就歸處西林菴著有山居雜偈

宗道字本如號一菴白沙西林寺僧持戒律工詩畫書法邑才士皆樂與遊有西林小草

超洪字解三號苞山邑封氏子出家白鶴寺後遊五臺山胡少宰延之閱藏遂駐錫京師建藏閣於圓教寺衆見白鶴繞閣三匝南還咸稱其異

大休邑人出家九龍菴復至青龍隆福寺歸嚶居梅園靜室亦名獅子林有竹橋小詠梅園漫稿

超定字定山號止止和尚年十七薙髮于安亭菩提寺後主滬城龍華法席著有語錄

超均字心目居東岡之曲菴入詩社

明誠字靈鷲浙江大雄寺方丈僧移嚶普濟菴主席有語錄詩偈

陶然字浩存號南村居吳淞江上與侯石菴沈賁園諸曠翁諸前輩爲觴咏之樂有詩文集二十四卷

宗安字止善號格菴外岡人脫白於白鶴寺後主虞山興福席善指頭畫枯木竹石有小芟草雲萌草梓行

克復諱悟仁俗姓甘出家西隱寺寺方衰落克復以苦行興復禪林又置田若干授其徒智圓徒孫竺林傳之

竺林迎養老母盡誠盡孝尤爲空明所難福聚字浩明居護國寺能詩王鳴盛稱其詩格在琴聰

蜜殊癡權懶可之閒文模字省非居聞慈院院有鐘樓工畫善醫間亦作韻

語教諭劉崧秀贈句云樓當一望城市野僧有三長書畫醫寔錄也

陳靜元城隍廟道士訪道穹窿授知事職選入京師光明殿掌理殿庫事一十二年後不知所終其徒平介凡徒孫高萬育皆能嗣法萬育更精于琴學

僑寓傳

宋

呂蒙正字聖功河南人微時曾爲婁塘何氏塾師見龔志紀遺後廷試第一三歷政府封許國公諡文穆

林英發永嘉人贅于邑之陸氏登進士甲科知建昌縣洞寇竊發有戡定功擢知壽昌郡守趙與憲少嘗師之及知平江禮意甚篤英發卒與憲葬之郡西穹窿山

吳進信字仲孚吳興人寓居白鶴村以詩名郡人麋先生吳之老儒也慎許可常見惟信陽春絕句云白髮傷春又一年閒將心事卜金錢梨花瘦盡東風軟商畧平生到杜鵑歎日子真謫仙才也

元

楊維禎字廉夫號鐵崖會稽人徙居松江往來嘉定寓強氏一時碑刻題咏多得其手

張天永字長年其先秦郵人元季奉母避地嘉定母喪後累辟不就余忠宣闕稱其文如水涌山出詩冲遠清麗比韋蘇州所著有雪蓬行稿溝亭集

王逢字元吉江陰人臺府交辟不就僑居吳淞江上與邑人士以吟咏相往還所著有梧溪集

張天羽自號雪蓬流寓嘉定張率爲作雪蓬子歌有鷄犬圖書共一船之句

吳轍字中行台州人元末迹跡泖濱懸壺陳溪之上顏其室曰野人居名人多題咏倪瓚繪圖以誌其勝後遷清浦里天仙待卒墓于此子孫世業醫

阮孝思字維則陳留人工詩文元季僑居嘉定與秦曷王彝金文徵張辰輩齊名又有虞堪字勝伯家長洲與孝思同僑嘉定著有鼓柅集

焦白字任道淮南人張士誠辟爲湖學教授不就隱海上以詩畫自娛明初蒐儒白變姓名寄食嘉定林才原家或諷曰君順而髯黃金加鞋爵列侯等不愈於帶索

耶白不荅竟卒于嘉定

見吳中人物志

謝應芳字子蘭武進人耿介尙節義文有根柢元末避兵白鶴江上年逾八十歸老橫山自號龜巢老人卽以名集

明

余叔敬宜興人元末兵亂負母避地嘉定邑人龔孟德爲買田築室于錢鳴塘居之知州張率題其居曰清曠軒王彝爲記

張觀字可觀嘉善人僑居邑中工畫山水師夏圭馬遠旣與吳興吳鎮遊筆力益古勁尤精鑒古器物書畫後徙華亭嘉興洪武間寓長洲之周庄歿

陳光遠不知何許人成化中僑居安亭望仙墩下醫術神異所善客子死于痘攜檣將之野道遇光遠視之曰而子不死吾當活之取沙遍壅其體命衆擊征饒之屬觀者堵以爲誕也有頃兒忽動旋活矣客問所以曰兒所苦水痘無力自達得土氣乃疏金爲水母鳴則水應而出矣御史行部而病長揖不拜旣胗脈曰大人無疾往時病當服補中益氣湯二十劑灸臚中二十壯乃瘥皆中半而止所以復發滿之自愈御史驚以爲神改容禮之他日就訪茅舍三楹不蔽風雨欲爲繕修固辭不受鹿城富人父病且死延致之方爲療治聞鼓吹聲問知納妾語其子吾意不在金帛脫幸活君父願以新姬相贈子唯唯卽令出侍寢遠笑舉所佩金牌示之有不近女色四字文且漫滅不知年所曰吾以試子父與妾孰重子無恡情可謂孝矣卒活之所至輒著奇效而子賄悉無所受人頗怪之後去不知所終

沈周字啓南號石田長洲人江東黃鎮延之家塾命子淮師之黃氏室壁間多題畫遺蹟宏治辛亥淮刻其詩

集

見陸時隆石田詩集後語

史寶字國信蕭山人僑居邑中通陰陽虛實之變一人冬月鼻出血教之服胡椒湯問其說因置豆數粒斗中急蕩之上下旋轉不失稍緩遂躍出曰此則君之病矣人榮衛調和則氣血流通君腦中受寒故血行澀澀則

不得歸經故溢出耳非熱疾也如其言而愈

沈鏞字英之慈谿人未遇時爲江東沈輔家塾師教其孫炤灼皆成進士鏞登宏治癸丑進士官至兵部尙書子涑字維東從父讀書江東後掄正德辛巳大魁仕至

學士

見沈氏譜

歸有光字熙甫崑山人嘉靖乙丑進士仕至南京太僕寺丞勿贅于安亭王氏居世美堂構畏壘亭聚徒講學自號震川海內稱震川先生其學原本六經而好司馬遷書得其風神脈理故爲文可配古大家時太倉王世貞方以辭章傾動一時有光抵爲妄庸子世貞聞之亦媿服嘉邑名士多從有光遊卽唐婁程李或嘗及世貞之門而辨香終在有光故有光之遺風餘韻嘉定得之獨深

馮淮字會東別號雪竹居崑山之安亭好吟咏往來吳淞江上濱江有禪寺時時獨坐古桂下吟不輟常以客授自給一日過上海陸詹事深時五月有朱橋垂顙詹事請爲賦詩淮卽口占語逼唐人詹事大稱賞之淮性瀟灑又好遊觀山水久之病日不出卜築盤龍江上父子力耕其間

宋登春字應元新河人棄家遠遊嘗至江陵客遼王所時徐學謨爲荊州守見其詩異之延爲上賓學謨罷歸嘉定登春行丐千里來訪學謨爲授廩不可自髡其髮

逸去已而學謨再起爲宗伯登春詣京師勸以早退且曰公第歸吾終當就公蹈東海死耳學謨旣謝事登春果來居二年去躍入錢塘江死著有宋布衣集燕石集張元陽海鹽人以豪傑自命好談天下事遊嘉定與張名由善名由詩序中稱元陽以論兵隱東海著有方隅武備

程嘉燧字孟陽其先休寧人僑居西城少卽工詩中歲自哀所作名浪淘集唐時升序之云孟陽之才力其雄豪跌宕沉鬱頓挫足以追配作者而哀樂所發長句短章必合于法度此其涵泳古人而得之者深也婁堅以爲其所師法不必同而同歸于自得均可謂知言至其工書善畫猶爲剩技太倉王罔伯常謂世無嚴武誰識少陵當今能容孟陽者海陽顧益卿耳爲治裝遣行渡江寓古寺與一二酒人酣飲三日夜賦古詩五章不見益卿而返晚寓虞山之拂水山莊題其室曰耦耕崇禎五年嘉邑舉鄉飲賓癸未歸新安而歿

宋珏字比玉莆田人詩畫書法高雅拔俗尤以八分擅長初見程嘉燧荔枝詩歌行求七載始識嘉燧于嘉定邑令陳一元座上遂以兄事之因遍交邑中知名十汪明際塾巾樓李流芳檀園皆其流連觴咏處也後竟以客死

葉允陞字熙時號石農休寧人明季僑居南翔與閔裴

村黃陶菴諸人友善工詩著有偶柱草

國朝

陳瑚字言夏號確菴太倉人明崇禎壬午舉人一上春官不第遂絕跡公車黃冠野服隱居蔚村著書萬餘言嘗以講學挈家寓嚠從遊甚衆歿後門人私諡安道先生季子邁于嘉因家焉

瑚自乙酉後閉戶鑿坯與陸桴亭講理學重修白鹿洞規陸菊隱致書敦請館嘉定西隱僧舍論說累月聽者無不快足于心

吳泰字一侗天都人卜居吳淞江之濱善鼓琴書畫爐香茗碗日以自娛生辰爲明之戊寅至本朝戊午年一百一歲徒步廿里訪張忍翁柯以傳寫扇以贈飲酒清談無異少壯人

葛芝一名雲芝字瑞五號橘菴又號臥龍山人明季崑庠生婁東張采之婿張西銘之高弟鼎革後潛心學道寓嘉邑之侯氏東園數年受法于江西萬鍊師旣而移室入山其室人亦知元學能辟穀著臥龍山人集容膝居雜詠徐枋爲之立傳

楊灝字章甫前明崇明人入本朝流寓嘉定徐氏之竹林院易方外服遍閱釋藏與汪彥隨孫和斗爲友人以高士目之

馬萬字士延長洲庠生以授徒流寓終于嘉城生平受

徐勉知最深如陸郭亭侯秬園王東臯皆爲密友著有詩論詩話旃檀閣風人稿樂府若干卷

萬積學工詩尤工詞曲性僻而介非義賙之則弗受當歲祲邑令余敏餽以秉粟謝曰我非翳桑餓人他日無以相報不敢食侯粟也邑人士皆高之後竟以餓死

許之漸字儀吉號青嶼常州人順治乙未進士官御史罷歸寓邑之西隱寺與侯秬園唱和最數梓有客嚶草王崇簡字敬齋宛平人曾寓嘉定有留別錢不識王內三黃蘊生詩

宋琬字玉叔號荔裳萊陽人來練川侯記原以秬園館之建康余懷澹心上海趙子瞻半眉杭州嚴沆子餐長洲宋寔穎旣庭雲間朱在鎬周望松江董宏儒君升周寰廣居武林王元璐爾調雲間趙子淵天心太倉許旭九日
後寓嚶與荔裳秬園流連觴咏于明月堂安雅堂之間極一時之盛

葉廷桂鹿邑人明兵部侍郎國亡後削髮披緇雲遊吳會邑人往訪之見其行李蕭然問其有僕否荅云國破家亡間關險阻一身猶多焉得有僕又問其子曰彼自用彼法吾自行吾意後浮海入閩不知所終

歸莊字元恭有光曾孫詩文豪放善大書工畫竹邑中多親申莊流連浹歲月有富商以厚幣丐作堂記莊訶

斥之去高介類如此

陳舒字元舒自云平湖人嘗登賢書或云金陵人勝朝遺老寓邑最久貌奇偉詩畫並儵然絕俗張僧乙爲作傳

俞慈成字心齋浙西人篤學砥行負經濟才明季大臣薦舉入都託病歸未幾京師陷變姓名寓嘉定病篤謂其子曰我上無以報君親下無以酬知己死後勿返祖宗墓勿刻詩文集我目瞑矣卒學者咸稱爲甲申先生莊雅字晏如崑山人少負奇氣後至邑中賣卜好吟咏野服黃冠時與山野畸人相唱和

董宏度字君節號夢龍又號蓉菴上海人寓居嚶以易名家著有翼注邑人爭延致爲經師

諸嗣郢字乾一號闇齋青浦人順治辛丑進士不仕嘯傲湖山提唱風雅九峯草堂之名聞天下寓嚶入東岡社社中友及海內名人咸造訪焉闇齋亦流連于東岡壘德其字岷瞻原籍松江世父宏儒父宏度皆以經師教授邑中德其寓居厰頭康熙戊午由嚶庠入鄉薦需次縣尹不赴選居常安貧味道志行卓然有兩世詩文集從弟歲貢生德華字滋邁有文行

諸士儼字莊甫號湛菴崑山人崇禎間庠生順治初卜居嚶城究心朱陸兩家言陸清獻造其廬相與反覆講論問學錄中有云莊甫之學不如陳權菴陸桴亭而刻

勵過之有勤齋考道日錄遷改圖說制行篇一簣錄共七十二卷經史人物詩文十六卷日記二十九卷

士嚴有日記以無自欺爲學清晨必拜天地次祖考次受業師已午間江南大旱飛蝗徧野士儼有田二十八畝四面皆蝕而獨不損一葉

郭亭雜記

侯開國曰康熙間都御史趙士麟檄行各屬講學邑令暨紳士延莊甫至明倫堂南面高坐講西銘一篇聽者竦然後聘爲義塾師下幃南園薄暮生徒旣散猶閉牖危坐如木偶有游女猝至窺之疑爲社神而忽動大驚歸病踰時乃瘥

嚴津字子問杭州人明三嚴先生之後久客膠城張忍菴侯秬園皆其居停主人有寓膠詩集

趙澐字山子吳江人寓膠侯太常趙侍御兩園有雅言堂集梓行并梓邑人投贈詩

黃世勣字天士崇明人遷膠所居名東園在陸太常園居之左兩子並工圍棋說見崇明邑志

周如凱字元暘崑山籍居安亭入東岡社崑新合志有名張宮字處中號仲垣松江拔貢生避兵寓嘉定居孫氏之樂在堂所著名檀園稿

吳歷字漁山明季常熟庠生著墨井道人集錢陸余懷宋實穎諸人序之張雲章爲立傳歷少孤母守節歷讀書鼓琴潔清自好問詩于陳孝廉瑚學畫于王太常時

敏念無以給母氏養尤專意于畫時敏盡發宋元人真蹟示之歷冥心契會得其神髓時敏謂其畫妙至不可思議與同門王石谷並美一時書學東坡母沒後棄其家東浮海至西洋經數萬里歸寓嘉定十餘年邑人多從遊者陸道淮是其高弟後終于上海年九十

顧子謙字仙隱號鶴菴先世居吳門因父愛嘉定薯蕷及笋遂築圃于白鶴村家焉明季補諸生工詩尤精法書

汪之蛟字長魚休寧人寓居青龍江構亭曰柳舫有蚓鳴集

朱瀚字霍臨號南詢上海學生以古學倡導三檉間著述甚富張雲章勉令編成詩集五十三卷文集四卷周易玩辭十二卷周易觀象二卷四書發明六卷左史發明四卷箋注毛詩二卷箋注韓柳歐蘇四卷杜詩解意二十二卷杜詩辨贗一卷杜詩闕疑二卷道德經注一卷莊騷合評一卷性理發明一卷感應畧解一卷論文四卷詩話二卷語錄四卷頌古一卷族譜一卷雜語一卷西廂評論一卷合爲寒香全集

柯斨曰南詢之學在儒家以爲異而畔道在宗門以爲博而未純於乎精誠所結敢曰文其在茲師友淵源歸于空明一鑑而已

陳嘉字靜孚明季太倉庠生爲黃陶菴高弟入本朝

授經於槎溪門下多知名士著有實獲草詠史詩簣遊草

陸濟字公謙上海人贅真如侯安國家善繪事著畫史竹譜行世

吳友龍字彥掄號拓菴天都人寓黃渡數十年工書法有贅疣詩子達遊庠

唐瑀字孺含一字仙佩號雪井常熟人寓邑之南翔黃渡最久著有邱隅破甑竹西諸草

沈白字濤思號賁園又號天慵居梅花源寓江灣里梓有賁園文存吳梅村稱其所撰均役碑吳淞江考畧皆經世之業又工書畫能詩歌年八十而歿

王吉武字憲尹號冰菴世居太倉之茜涇僑居邑之南城領康熙壬子鄉薦丙戌成進士歷官中書舍人國子博士虞衡屯田司陟民部出守紹興罷歸有冰菴詩八卷行世

顧大行曰冰菴在博士時王阮亭爲祭酒相與論詩阮亭有江左無雙之嘆

張立綱字惇五號俟軒崑山庠生寓嚳數十年著有易經臆解禮記采輯明史蠹見偶存稿慎終集見聞雜記諸書

樓儼字敬思號西浦婁縣人以明經纂修詞譜官至按察使司嘗寓嚳受業于孫松坪工詩尤長樂府有蓑笠

軒僅存稿

王焜字大生號卓人原名森由崑山徙居嘉定康熙丙子由長洲籍中式舉人任丹徒教諭以孫鳴盛貴贈通議大夫光祿寺卿著有考盤集賓司軒柰何集

施華祖字仲光洞庭東山人遷居黃渡鎮康熙十一年疏濬吳淞江憲司遴選華祖經理其事十九年歲飢設賑羅漢寺仲光捐米勸事知縣陸隴其獎額曰功勳濟世

朱厚章字以載號葑庭崑山庠生幼撫于邑之張北田家寓居東里雍正甲寅舉博學宏詞乙卯病卒有多師集行世崑新合志曰厚章所著有五經疏畧義山詩注

考古圖說

沈德潛曰葑庭工歌詩雜文及駢體小詩又善八法嘗于其坐見旁列二人各執筆磨墨申紙以待葑庭口授一成四六序一改友人長律而已又謄寫某孝子傳約千餘言頃之序成多新語長律亦完善謄寫極工楷無脫誤中又與子道別後相思語以是知五官並用驚其能

蔡宗焞字雲倬漳州人天性孝謹親喪未葬不御酒肉者數載邑侯劉給匾曰庸行堪師

吳一鵬休寧人康熙時商于南翔好施樂善偕本邑紳富倡建留嬰堂後改育嬰堂泐名于石今裔孫鑣家于

翔鎮

金以報字永爲桐鄉廩生有詩才性耿介而勇于爲善聞有義舉必傾囊助之阮元定香亭筆談中亟稱之曾煜字亮公號發菴太倉歲貢生爲婁塘陳氏館師遂家焉性耿介有書癖見異書必傾修脯購之考字學喜吟咏著發菴詩鈔六卷詩餘一卷門人陳以成等刊之

卷十七

人物考七

明史皇后列傳

莊烈帝愍皇后周氏世居婁塘父奎徙蘇州葑門隨族人至都遂家焉后其長女也生而清貞端淑幼時坐必南嚮奎善星卜謂女必大貴天啟中選入信邸冊爲信王妃帝卽位立爲皇后封奎爲嘉定伯后性嚴慎不預政事田貴妃有寵而驕后裁之以禮歲元日寒甚田貴妃來朝翟車止廡下后良久方御坐受其拜已遽下無他言而袁貴妃之朝也相見甚歡語移時田聞而大恨向帝泣帝嘗在交泰殿與后語不合推后仆地后憤不

食帝悔使中使持貂襜賜后妃等以過斥居啟祥宮三月不召一日后侍帝於永和門看花請召妃帝不應后遽令以車迎之乃相見如初帝以寇亂茹蔬后見帝容體日瘁具饌將進而瀛國夫人奏適至日夜夢孝純太后歸語帝瘁而泣帝持奏入宮后適進饌帝出奏示后再拜舉匕箸相向而泣淚盈盈沾案崇禎十七年三月十八日晝暝都城陷帝泣語后曰大事去矣后乃撫太子二王慟哭遣之出宮帝令后自裁遂先帝崩福王時謚孝烈皇后 國朝改謚莊烈愍皇后 蘇州府志載奎第就其徙居而言耳

周奎賣藥長安市中陳仁錫嘗主其家奇后狀貌謂

奎曰令愛大貴人也使以通鑑教之故后於此書最

熟見陸元輔菊隱紀聞

貞烈孝節賢才

貞

明

張氏安亭汪綬妻抗節死嘉靖二十五年巡按王言題

建專祠賜額哀貞 載明史列女傳及尤侗明史樂府

歸有光書事畧張貞女父張耀嘉定曹巷人也嫁汪客之子客妻汪姬多與人私客老矣又嗜酒日昏醉無所省諸惡少往往相攜入姬家飲酒及客子娶婦惡少皆在其室內治果殺爲歡宴一日姬與惡少同

浴呼婦提湯見男子驚走惡少中有胡巖最桀黠入
與嫗曰小新婦介介不可人意得與胡郎共寢卽歡
然一家吾等快意行樂誰復言之者嫗亦以爲然謀
遣其子入縣書獄嫗嘗令貞女織幌欲以遺所私奴
貞女曰奴耳我豈爲奴織幌耶嫗益惡之胡巖者四
人登樓縱飲因共呼貞女飲酒貞女不應巖從後攬
其金梳貞女詈且泣還之貞女折梳擲地嫗以已梳
與之又折其梳遂罷去頃之嫗方浴浴已嫗曰今日
與新婦宿巖人犯貞女貞女大呼以杵擊巖巖怒走
出貞女入房自投於地哭聲竟夜不絕明日氣息僅
屬至薄暮少蘇號泣欲死巖嫗恐事泄繫諸床足守

之明日召諸惡少酣飲一鼓共縛貞女椎斧交下斃
焉共舉尸欲焚之尸重不可舉乃縱火焚其室隣里
之救火者足蹴其尸因共驚報官逮諸惡少鞫之嫗
死於獄嘉定故有烈婦祠貞女未死前三日祠旁人
皆聞空中鼓樂聲祠中火爰爰從柱中出人以爲貞
女死事之徵貞女名玉娥死在夏五月十六日越四
月勘官發屍跡之中經禱暑顏面如生
劔窟中尙流血作人吐舌謂未有也沈果作張玉娥
傳陸滂作哀娥賦賦中有云蹇娥之不從溷兮揭日
月而流光於乎哀哉兮
生也女雄死也貞殤

林氏貞女也王翹爲作白璧歌

國朝

王氏生員重度女諸翟侯世仍聘妻未婚而世仍天王

卷十六
三
聞訃蓬首垢面矢不再字終身居一小樓年六十餘歿
侯氏迎其喪與世仍合葬

譚氏南翔滕天祐聘妻天祐早亡譚守志父母家後父
母俱亡乃歸滕孝養舅姑至五十餘歲歿知縣李士甄
贈聯云守貞完處女行孝代亡夫

甘氏宜興教諭歸梁季子臣燠聘妻

嚴氏西城印佩金聘妻年二十佩金亡聞訃悲慟詣印
成服茹素守志以歿

王氏十二都監生之冕女許字郡城仇士永士永死王
年十八上無舅姑依母家守貞

沈氏父家婁縣許字河號錢芳峙芳峙亡氏年十九歸
錢養舅姑撫嗣子守貞

江氏一都趙春霞聘妻春霞死請於父母歸趙守貞毀
容截髮茹素終老督學謝履厚獎曰節操傳徽

張氏王俶臣聘妻俶臣死張哀絰歸王守貞

唐氏北城顧繩仁聘妻繩仁死唐年十五歸顧守貞年
四十二太傅嵇曾筠獎曰閨貞完璧

陸氏庠生王繼曾聘妻 邱氏朱璣聘妻

張氏沈育聘妻 王氏徐模聘妻

葛氏周秉洪聘妻 周氏范道成聘妻

錢氏河二圖沈凌九聘妻 顧氏楊鳳鳴聘妻

邱氏制五圖朱占星聘妻 孫氏朱學易聘妻

姚氏沈應麟聘妻

朱氏諸仁藹聘妻

以上已旌

管氏菱門涇邱崇華聘妻

王貞女名秀文進士泰際姪女許字同邑項時鳴之子
準旣而項家日落秀文之母別納朱宦之幣秀文聞之
涕泣不止謂惟死可免遂摘金耳環嚙之七日昏絕者
數矣王氏有老姊以奇藥至家人抉其齒灌之金環得
出泰際密與時鳴約以輿來明日準親迎秀文以歸番
禺屈大均郡人尤侗皆爲作傳

浦氏七都茂甫女許字周恩死守貞

高氏婁塘徐啟蟠聘妻

金氏南蓀之女許字守貞

顧氏六都朱方暉聘妻

石氏程景猷聘妻

范氏唐湛聘妻

殷氏陳中周聘妻

俞氏顧炯聘妻炯死俞誓必往拜父母不能奪從之旣

至謝翁婦許柳哭盡哀遂奉木主守貞

程氏文松女年十五許字謝玉珍死守貞

姚氏石潤躬聘妻

金氏陳令望聘妻

江氏婁塘韓錦聘妻錦亡歸韓依姑以守

沈氏許字李康康亡絕食而歿

胡氏陳瑄聘妻

毛氏沈潮聘妻

祝氏河號三圖陳銳聘妻

韓氏李務本聘妻

莊氏字玉清幼喜作詩許字編修余集次子佛保蚤亡

卷
氏矢志守貞抑鬱以歿王鳴盛爲立傳有玉清遺稿一

周氏陸芳惠聘妻年十八守貞紡織以養舅姑喪葬盡禮撫姪成立苦節二十年秦大成傳其事

唐氏顧廣成聘妻

葉氏鄒日煜聘妻

俞氏南翔郭天瑞聘妻

沈氏南翔嚴錫祺聘妻

金氏許字吳璋璋死守貞

陸氏許字吳縣沈佺佺死守貞

金氏周楠聘妻

湯氏胡德能聘妻

以上未旌

烈

明

錢氏吳家行吳緯妻十九歲夫亡妊方四月旣生男里人謀娶之錢聞卽扃戶自經家人驚救良久得甦一日設奠子琦匍匐前取食因喜且泣曰兒能自食無須我矣遂絕食死年二十三

孫氏上海刑部司務鶚女八都生員沈思道妻少知書夫病瘵死卽引刀自刎以救免復百計自殘家人旦夕守視之明年七月扶柩營葬又投江救起事畢醉侍女扃戶自經年二十七

宣氏邑城張樹田妻樹田與同里沈思道友善思道妻孫氏夫婦相愛而樹田暴戾無人理樹田病節婦進藥

樹田泛之罵曰若毒我乎節婦飲泣而退及樹田死節婦被髮號踊是時沈思道亦死孫氏與節婦兩人志意相憐數遣女奴往來比孫氏送夫喪過河下因求見節婦以死相要頃之同日自縊節婦有救之復甦而孫烈婦竟死其後三年父母謀嫁之節婦見其家竊竊私語覺其意登樓自縊載歸太僕集

劉氏月浦潘日期妻十七而婚產一女數年日期死值歲祲竭力養姑常自忍饑居二年有欲奪其志者劉聞泣與父母訣返祭夫哭盡哀闔戶自縊年二十七邑人王道通爲立傳

金氏邑城封瑗妻萬歷四十三年年十九而婚甫三月瑗亡金痛不欲生禱於神願以此後年齡半歸父母半歸翁姑及瑗祖母死將耐瑗金詢築幾室姑曰一室金聲淚俱下抵暮邀姑語嘖嘖不休至夜分姑始就寢侍女報金投繯死矣邑人嚴衍作傳趙洪範撰碑

熊氏諸生王度妻度貧甚挈家教授於崇明南沙猝聞倭至夫婦負子女走匿叢葦中賊追及欲執熊去熊詬曰我良家子誓不失節賊怒剗刃向度熊以身宛轉翼蔽度得全而熊被創死兵備任環爲詩弔之學使趙鏜賻粟三十石仍令有司表其門徐宗伯學謨爲立傳

錢氏德化知縣春沂女與文知縣張振德妻從夫死烈事詳振德傳中二女淑昭淑慶同死詔贈錢氏貞烈二

女孝烈耐振德祠

徐氏名懿順生員甘應麒聘妻未婚夫死徐欲歸甘持服泣請於父母不許請送葬又不許潛謂妹曰吾受甘氏聘卽甘氏婦也甘死將安之乎乘夜自經死距應麒死纔二日時嘉靖六年年二十二邑人郭山作傳

以上已旌

金氏名淑寧國子學錄文徵女適禮部員外張槩洪武十九年槩坐法當死金聞之曰我雖嫁未期月不可使夫獨死然夫死而死孰若先之遂自經後三日槩得釋人咸傷之天台林右爲立傳

沈氏顧隨妻年十九而婚產一女夫亡父母潛納李氏聘沈聞入室自經死

高氏狄阿先妻婚一月阿先患癰死慟哭三日家貧火葬奮身投烈燄姑救免歸復自經死

水氏吳金妻金與兄出漁吳淞江上金爲虎所噬兄奔告水水卽挺刃往格亦死於虎邑人陸剛中作刺虎行顧氏八都沈鵬妻天順五年七月海溢姑與夫俱死次日遂自沈長子湘有文學丐郡人都穆爲立傳

嚴氏十一都南阜女未嫁而夫亡父母議再字女聞勺水不入口家人強進糜氏嚼碗噎吻而死時嘉靖初年

顧氏名阿妹府志作妹長洲陳林妻寓居邑之菱門涇嘉靖

三十三年四月遭倭亂顧負兒匿田間爲賊所得劫之

行至黃家橋西棄兒自溺後人易橋名曰尙節

某氏安亭里人嘉靖三十四年爲倭所得至佛舍欲污之衣紉結甚固不可犯乃剖其腹腸胃流出里人爲藁葬北原上歸有光題墓碣

王度婦少而有姿嘉靖間避倭田間倭逼姦之度以兩手抱持其婦寧死不令婦辱賊賊乃截度兩耳蹶焉而擄其婦婦呼度不起賊脅之以刃堅不從大罵遂殺婦已而度亦死

潘氏陸梅妻隆慶五年有訟梅逋賦者縣遣卒捕梅不得縛潘至吳興寺橋不肯進卒挾以渡繫外岡民家梅至釋潘潘大慟曰身爲婦人而卒挾以渡何用生爲歸

念子飢織布質米餉之遂自經死

陸氏徐斗英妻斗英亡姑以陸年少諷改嫁陸怛悼入室自經姑急救甦乘間投園池握菱正立而死時萬曆三十七年四月知縣陳一元給獎

殷氏黃浦東里人嫁黃龍生一子先死歲餘龍亦死烈婦號哭晝夜不輟聲請於舅姑願立後守節舅姑疑其僞也弗聽里人聞烈婦賢爭欲娶之有強委禽者夫家許之烈婦固請守節百方終不聽乃跪謂其姑曰新婦不得已將再嫁幸延吾母及鄒氏姑爲別鄒氏姑者龍之母黨龍幼育於鄒烈婦其所聘娶也姑許諾爲延烈婦之母與鄒氏姑至烈婦具酒食敬進且拜且泣曰諸

大人良食自愛長與膝下辭矣卽行哭入房爲改服狀
久之不出旣而磔磔有聲則持刀自刎死矣黃進士淳
耀傳之如此舉人張錫眉曰吾少時往來黃浦上頗聞
烈婦死狀其死時倚床柱一手尙握刀而頭已向後倒
裂矣蓋頸裂向後名狼顧者由其用力時惟恐不殊創
巨故也此天啟元年事

喬氏何介妻介以醫寓京師闖賊陷城喬有女先令投
繯乃自縊介終身不復娶

王氏龔廷諫妻嫁二年夫亡矢志守節里克徐月溪乘
亂糾衆劫王欲犯之王給曰汝遠來勞苦盍少憩乃入
別室以針縫表裏衣赴屋後池死衆猶索之見尸特立
水面示不可犯狀遂駭散崑山諸士儼爲立傳月溪病
背癱死雷碎其棺

向氏孫和京妻金氏龔孫玳妻周氏唐昌全妻某氏王
雲程妻雲程二女長爲黃淵耀妻某氏吳躍妻某氏潘
大綸妻某氏陳思文妾某氏某氏朱長祚妻何氏張錫
眉妾皆嘉定城破時從夫從上死節

沈氏宏濟之女明靖江千總陳竑妻竑先以禦海寇死
江陰順治二年城下時沈孀女赴水死

顧氏東城沈大道妻城下時同其子兼妻周氏投楊樹
淇死覓屍時從其履識之姑媳猶握手不解

徐氏東城沈大綸妻大綸被刃徐遂投二子於河自經

死大綸得甦終身不復娶

汪氏生員張錦妻兵將至家人勸避難汪曰吾年纔二
十四安所避乎與其辱而生寧死而不辱遂投井死姑
周氏亦躍入死

張氏陸宏繼妻兵縛宏張與婢蘭花投舍後井中死越
兩月張父收其屍猶僵不腐衣裳皆密紉

王氏黃道宏妻兵至攜二女赴井長女曰若母先投則
女反在上乃挽妹先投母繼之順治七年憲獎

李氏南城秦一騏妻城下時投泮池死時年七十一媳
戚氏及二女孫從死

陳氏沈昌世妻赴水死陶氏吳三穀妻自投清鏡塘死

瞿氏沈近妻不受污與其夫大罵而死姚氏朱世臣妻

張氏金繼標妻李氏何凌虛妻俱城下時死節

金氏一門死者德開妻侯氏爲峒會幼妹城陷聞夫死

自沈於葉池其女適南翔諸生李昂昂爲亂兵所害歸

依父母從父母死德開有妹適張宏乾死於兵金堪士

妻陳氏諸生琦徵女從夫死又鄭氏李杭之妻允驥女

杭之卒依壻金起士同女赴水死

張氏諸生婁復聞妻夫死張亦死楊氏諸生周燦妻兵

至欲污之躍石岡之水死燦後不復娶顧氏諸生印鴻

妻生子甫三歲而寡兵至赴水死

已上浦嶂兵至死節者

氏布政錫爵女給事中侯震揚妻以子峒會封太恭

人事舅姑孝姑陳太孺人臨歿執龔手願世世汝姑我婦以爲報崇禎甲申流寇陷京師龔謂峒曾曰汝世受國恩當以身許母以吾爲念乃從季子岐曾郊居而峒曾城守龔悉出簪珥佐軍迨峒曾及其子演潔死難龔謂婦李恭人曰我有子矣爾亦有子未幾岐曾復以故人亡命逮問龔曰岐曾行從容赴池水死從死者岐曾妾劉氏嫗陳氏婢徐氏小婢長春又僕俞兒妻錢氏械繫至松江義不受污自經死

沈氏生員寧祖女許字須璘順治二年城下時父兄並死沈以簪刺喉而死年十四

殷氏生員殷儒女遇亂投水死

見思勉齋集

葛氏莊子駿妻陸氏殷子莊妻殷本姓莊葛氏陸氏之姒也陸與小姑沈錦妻莊氏居隔一水城下時陸抱女小閑與莊聯臂投河死葛氏投河死亦同日

婁氏堅女龔用廣妻沈氏龔用厚妻事見龔用圓死事

中
嚴氏員外郎貞度女俞有美妻有美亡不食而死縣獎曰柏舟自矢

宣氏生員坦女居婁塘乙酉坦隨城守團聚鄉勇爲守禦城破軍帥引兵勦其家獲坦妻周氏氏出哀求軍士見之舍周牽氏以行倒地哭罵受刃數十事平家人殮其屍幾不能舉云

烈女名還年十七未字乙酉七月朔同母周氏遇亂俱抗節死見水抱集

鄒氏郁所志妻城陷自投於蔚園後池死

張氏早寡叔某攘其田廬逼改嫁陸姓氏遁兄所叔偵其兄出劫以如陸氏卽絕食乘間自縊死

邱氏孝子隆光女嫁陳珙事姑以孝稱天啟三年珙死邱年二十誓以死從姑聞之亦不欲生無已乃日未亡人當爲已亡子供職閱七年姑亡邱卽決言今且從夫於地下一慟嘔血數升絕粒而死

張氏生員美中女嫁沈可立子其參恪盡婦道其參客死九江張撫孤守志姑欲迫其改適遂自經死年二十七

以上未旌

國朝

楊氏生員兆紳女許字王政新年十四政新亡女請視含殮父母不許蔬食布衣以死自誓年餘兆紳以渡海溺死家人曰母老弟幼將誰倚耶女不應括髮毀容勤機杼以贍養如是者四年姑林氏聞而賢之來相慰女見姑拜慟絕于地明日姑遣女奴諭意曰勿以我故誤汝青年女曰姑疑我志不堅乎乃紉其上下衣翦髮置父靈几投纆於側時年十八

葛氏名靜爲一都蕭環妻翁某武舉也氏年十九而婚甫二十七日夫亡撫夫次兄之子巡爲嗣夫伯兄欽素無行父沒悉蕩其業至是利武生申某金謀奪葛志行

事有日矣葛知之恐不免設祭告其夫密紉上下衣卽
日自沈于河以死時年三十四

孝友堂文集與樸
村文集所載稍異

唐氏南郭民黃狀妻儻居張某屋前鬻果蔬爲業會鄰
僮某至與狀立語張素與狀有隙乘醉誣狀賣姦控于
官氏橫被誣讎極罵詈張復加惡聲值狀他出氏乘
間自縊于張之中門年甫十八雍正十二年二月事也
獄具張某當抵法會赦免按例旌

高氏譚士妻陸氏周誦清妻皆夫死自縊

王氏南宅村金趙鳴妻夫亡絕食八日死年二十二

范氏北城王元嘉妻撰敬銘之媳婚二載而夫亡范
絕食七日死時雍正十二年知州江之煒獎曰閨秀節

烈知縣程國棟獎曰巾幗夷齊

秦氏淡號十圖邱昱聘妻聞夫亡自縊而死督學李獎
曰義重身輕

嚴氏貢生鴻業女胡大珏聘妻大珏死氏絕粒七日以
殉里人葉昱爲作傳

李氏嘉賓女未字中以蜚語氏忿然曰名可污耶遂
自經

金氏子魚裔孫女適寶山庠生孫象坤子某夫病而婚
夫亡書絕命詞自經

以上已旌

李氏南翔人父家富無子氏年十八適涓浦蘇潤五

載夫亡製木主置臥室飲食相對里兒艷其富且美賂其夫兄謀娶之氏聞怡然曰故知吾不終也但五年夫婦必一祭而後行祭畢慟哭入內自經死時順治初年周氏俞可爵妻三十歲夫亡族人覬其產逼之改嫁不從謀于盜魁將強劫之周聞闔戶積薪自焚屋既燼遺骸端坐不仆面目如生邑人吳康侯有記

袁氏周萬新妻年及二十有五生二子俱不育勸萬新納妾生子二歲而萬新亡袁語妾曰若子卽我子也我與若同守子得成立不墜周宗矣居三年妾信讒搆屢侵袁至不能堪袁祀萬新而哭遂經死

揚烈女居楊家行蚤喪父母與弟妹相依食貧未字婚

某氏素悍欺其孤弱時與借貸偶不遂所欲誣以有娠揚言于衆女苦于難辨自剖腹以死時康熙八年秋

盛氏西門外唐世俊妻事舅姑甚孝夫病篤欲先死以明不二夫不許及夫亡殮畢遂自經時康熙十五年知縣陸隴其親往祭之獎曰志烈可憫

陳氏陶其村龐某妻年十八而婚歲餘夫患病篤卽以死自誓及夫亡家人守視之陳乘間投淵死

過氏邑城陸殿揚妻婚二年生一子又二年夫亡欲身殉姑以撫孤諭止之半載子復殤乃告姑曰媳緩死以兒兒死又何生爲夜鍵戶自經時康熙三十一年年二十五布政司使張志棟獎曰巾幗完人

沈氏楊家行張昂聘妻父母死依孀嫂以居未嫁昂死請之嫂衰絰奔喪舅以幼子後之越六年痘殤沈投淵者再皆救免歎曰吾夫死所撫又死復何依終當死耳一日祭夫慟哭至暮紉衣自縊死時康熙三十五年年二十五

高氏南城李邦藩妻康熙三十六年夫與翁俱疫死高痛不欲生以姑病侍湯藥月餘姑復亡遂投井死年二十六

朱氏生員昕女許字望仙橋錢玉未嫁而夫死朱年十九聞訃服衰絰夜密紉之自縊死越三日而殮顏色如生與玉合葬時康熙三十八年

黃氏邑城王懌妻年十九歸懌半載夫亡絕食而死督學張元臣獎曰貞烈

陸氏廣福王乾妻乾患瘍陸紡織供醫藥卒不起殮後自經死時康熙五十年年二十五

印氏名乾盛生三祝女許字西門外徐吉士吉士死印年二十一請守志母不許闔戶自經者再以救解伺間投園池死與夫合葬于漳浦口之北臺司並獎

張氏菱門涇邱淵著聘妻淵著亡張年十八父母潛許他姓張絕食三日死康熙五十一年與夫合葬

沈氏在城戴聖功妻夫姊有淫行欲免之沈泣不從自縊死年十九歲

張氏貢生詩女北城顧倬曾妻婚一年夫亡無子矢志守節後張歸寧夫兄鬻其棲房張嘆曰是絕吾歸路也歸而設祀舅姑與夫號慟半日夜自經死時康熙五十八年年三十六府縣並獎之

徐氏東城陸鎬妻二十二歲夫亡殮時以頭觸棺慟絕救甦屢求死家人守視之後八月乘間登樓自縊死時雍正五年

陶氏王需吉聘妻需吉夭陶聞訃自經母急救甦毀粧截髮母嫂曲諭之終不易志未幾絕食死

沈氏楊家行張氏養媳夫數犯之沈峻拒猶弗止乃密紉其衣赴水死年十六

陸氏趙方召妻年二十而寡慟極欲死舅姑以孤幼諭之氏曰舅姑未老尚可撫此兒竟餓死

湯氏薛涇人許字同里王謙益謙益年十六而殤烈女往視殮號泣如不欲生者比還晝夜哭不飲食遂病病且殆父母問所欲言則曰夫婦牀合也兒死請葬于王氏父母諾而慰之曰若果有志若幸愈令若往奉若舅姑烈女已不能言領之有頃卒

張氏李士鎬妻年二十三夫歿誓以身殉姑百方諭止之一日弟來視語之曰汝勉自立我將從夫于地下矣竟絕粒卒婁東王撰爲立傳

金氏河二圖沈永妻永故無賴子利惡少金導以犯婦

不從強逼之婦懼不免赴花園浜死

張氏戚某妻蚤寡一子又殤誓以身殉遣人辭父母父母急往視之已掩戶自經矣上下衣服皆密紉

錢氏外岡人監生楷女歸附貢生朱鍾勳夫亡氏方娠慟哭誓以身殉姑力止之越三日媿妊泣謂姑曰吾事畢矣撫棺一慟氣息垂盡亟延醫診之曰心脈絕矣遂卒

閻氏年十七爲金紹山妾紹山老病閻事之十二年無恐色紹山死有僕婦憐其年少諷以改適輒批其頰自縊

美氏南翔張詠妻詠死氏年未三十無子女既殮密紉

其表裏衣赴水水淺不能濡以面伏泥滓而死

醫樓婦某氏蚤寡無子矢節養姑姑恒憶子而哀輒寬譬之時進酒果以悅之後二十年姑死既葬卽自經

朱氏趙某妻趙負豪金豪親往索見氏色美悅之授意于趙素所往來者得一親婦膚澤債可已趙畏其勢欲謀諸婦氏曰不允則害我夫姑允之悉燒其券失身勿慮也趙遂邀豪至其家券悉焚氏佯作喜色曰請入稍修飾方可侍富人豪待久不出則已縊于樓矣

王氏小家女適踰匠生一女匠負坊甲銀甲固棍惡禁不令踰布匠無生業貧難度日計維鬻妻償負猶可踰布自活氏偵知之恐死後鬻女爲人婢遂伺深夜以繩

自繫并繫其女共沈于池見者酸鼻

有姑媳守志者族人覬其產逼之改嫁不從日益逼之
夏日媳往田中耘棉其姑積薪滿屋自焚死媳見火熾
趨歸已不能救矣屋宇既燼落而姑遺骸獨端坐不仆
方火烈時煙焰中有一白鶴背坐一婦人翔空而上里
人皆見之

見陸時隆
見聞隨筆

朱氏鄭某妻夫歿撫孤守志孤又殤遂不食死長洲閩
秀朱宗淑爲作烈婦行

王氏陳瑞徵妾時瑞徵年已七十五未幾病歿氏慟絕
復甦剜左目不食五日死

譚氏唐廷廣妻年二十五夫歿自縊死趙向奎獎之曰

生氣猶存

章氏自婁塘移居劉河年未笄許字姚姓夫歿過門守
貞姑欲奪其志自縊死

凌氏上海人許字金惟驪惟驪歿氏年十七聞訃暗泣
日盡腫托病奉佛衣縞素不茹葷歲餘有議婚者氏聞
之夜半自經嗣子以塋迎其柩合葬之

金氏許字錢超超歿氏年二十聞訃痛哭絕粒而死
潘氏張憲卿聘妻憲卿歿奔喪視殮畢赴水死

曹氏監生王長慶妻夫亡自縊而死

嚴氏許字倪某年二十三夫歿聞訃痛哭自縊倪氏迎
歸合葬

楊氏名貞朱爾觀聘妻爾觀歿氏聞訃欲奔喪母不許謂母曰脫兒死必歸骨于朱次日自縊死知縣姚學甲獎曰貞烈流芳

以上未旌

孝

宋

楊九娘居楊涇性至孝父命夜守桔槔苦爲蚊嚙不易其處竟以羸死里人祀之其地方廣數里絕無蚊害他處當暑夕輒書九娘以禦蚊

明

徐氏生員周鼎鉉妻夫客授于外徐竭甘旨奉姑姑遣嫁幼女乏貲粧盡頃嫁時奩贈之姑患疽垂盡亟籲天求代姑愈徐無疾而逝已而鼎鉉繼妻楊氏生女事祖母父母盡孝會歲大祲以白粲奉親自食糠粃年十八以勞瘁死崇禎十五年徐與女並旌

沈氏時恩之妻性端靜于歸時年十八恩爲商汀海間或經歲不至家而其父母與大母俱無恙氏日藉機杼以承兩姑之養姑之母王氏亦依壻家性嚴甚小失其指諱語不休氏踧踖謝過伺其色和而後退歲常大祲米價翔貴氏具食以奉諸母已獨不飽至采野藿雜食之生子偕行爲名臣

徐氏宣光祖妻宜于諸妯姑暮年喪明氏奉侍不去側

行則扶掖食則進箸如撫嬰兒姑年躋九十無疾而終
宗黨稱之

黃氏萬年女萬年病篤女割股以進病立愈崇禎十三
年知縣龐昌允獎曰閨門孝範後適沈于宣

沈氏高仰谷妻夫以糧役入都姑病瀕死沈呼天泣曰
姑以思子致病夫聞母死必不生請以身代乃割股肉
以進獲愈谷亡時年二十有五無嗣力作養姑至七十
五歲歿

瞿氏見孝子沈輔傳

顧氏太學生邱隆光妻崇禎間與隆光並旌詳隆光傳

凡

盧氏北城趙銘妻割股療舅病姑目盲舐之復明後歿
醫居營葬布政司使趙向奎旌其廬曰女宗純孝乾隆
元年建坊旌表士林贈言盈帙名旌孝錄

徐氏邑城尹維乾妻家酷貧勤苦操作佐夫奉姑姑病
割股以療順治八年憲獎

王氏吳淞馮應元妻二十九歲夫亡撫孤守節舅耄年
病癰穢氣達戶外王洗滌醫藥八年不懈康熙八年憲
獎

林氏名雲東字震來如臯丞蔡成志妻能詩性至孝事
姑盡禮河道總督李宏爲立傳

嚴氏貧照妻侍姑病輒晝夜不寢涕洟必手拭而日吮

之數年弗怠姑歿盡哀聞者賢之

張氏侯永妻明舉人錫眉孫女也姑金氏病篤張割股以療夫亡養撫盡瘁知縣李士甄獎曰操凜松筠

許氏進士自俊妹舍人馮繼奎妻夫亡守節姑病割股肉療之知縣余敏獎曰節孝維風

汪氏教習江旭妻竭力事祖姑倪氏十六載如一日事姑許氏至九十四歲以孝稱

李氏邑城周康侯妻姑老病醫言乳哺可復健李方舉子謂夫日子可再得母一而已遂棄子于途乳其姑逾年獲愈後知棄子爲殷姓收養仍歸宗名之曰紹殷

見

袁氏潘福妻福故陳氏義兒爲主守家力農織履以自

給袁常饜糟糠必購肉奉姑隨姑寢處以勞瘁先姑歿

錢氏錢氏張氏二錢氏姊妹也一爲益友妻年二十七

夫亡姑以哭子心痛錢割股以進姑尋愈守節三十四

年卒一爲益曜妻姑病膈久醫藥罔效婦亦割股進之

姑頓能食飲平復如初其從妯娌張氏益彥深妻亦割

股療姑疾人謂益氏一門三孝婦

見孝友堂文集

陳氏一都趙某妻夫早世守節事姑盡孝姑老病不能食嚼飯哺之垂三十年不倦姑以老壽終

龐氏黃渡金南藩妻事姑龐氏至孝姑病親奉湯藥寢食俱廢願天願以身代沈頓數月氏勞瘁憂苦忽嘔血

數升而殞子生員金模遇人謂之曰上帝以汝祖母茹素繡佛且有孝婦得延壽八載已而果然汪氏紀王鎮朱漢南妻舅老病篤汪顓天割股和藥以進舅病獲痊

談氏邑城李輔妻輔授徒遠地談事舅姑孝姑病日盲談每晨以舌舐之歲餘復明知縣王樞獎曰閨中曾閔唐孝女甫十歲父士愷吐血數升卽割股救父願以身代旋以股瘡潰爛而亡

張氏名懿國柱次女年五歲母楊氏歿張撫尸慟絕左耳廢聽祖母馬氏病癱瘓便溺寢起晝夜扶持凡十年馬歿懿哀毀一督學楊中訥獎曰孝女維風郡守陳鵬

年獎曰閨中純孝

張氏孟修之女性至孝年十四母顧氏病篤醫藥罔效氏卽割臂肉和羹以進母病旋愈如是者兩次家人莫之知也後見其臂上有疤叩之乃以實告

陳氏甫翔苑士鏡妻夫亡年二十五以紡織供養舅姑姑病割股雜藥以進姑歿適西鄰不戒于火勢甚急曰奈姑柩夫柩何大慟風卽反火滅于是日積數錢累三年購地葬其姑及夫里中咸稱異之

陳氏李士美繼妻生三子而士美亡氏奉姑撫子艱苦備歷姑老病常在床褥侍奉湯藥非親嘗不敢進年九十尙健五世一堂孫曾合五十八人

徐氏閔天吉妻刲股愈姑病天吉死姑以哭子疾復作
氏以乳飲姑雍正十一年旌

徐氏胡大勲妻年二十五夫亡撫孤事舅姑孝姑病篤
終夜跪禱姑夢神賜藥吞之而愈經營三世喪葬姑嘗
墜河氏躍抱姑達岸守志五十年乾隆四十五年旌
周氏胡成基妻二十四歲夫亡撫孤成立姑目盲跪舐
月餘復明鄰舍失火姑臥病夫柩在堂氏望天泣拜風
反火滅守志三十二年乾隆六十年旌

以上旌者凡六人餘未詳